

CHRISTOPHORI

A COSTA, MEDICI

ET CHEIRVRGI

*Aromatum & medicamentorum
in Orientali India nascentium*

LIBER:

PLVRIMVM lucis adferens iis quæ à Doctore
GARCIA DE ORTA in hoc ge-
nere scripta sunt.


CAROLI CLVSII ATREBATIS opera ex
*Hispanico sermone Latinus factus, in Epitomen
contractus, & quibusdam notis illustratus.*



ANTVVERPIÆ

Ex officina Christophori Plantini.

M. D. LXX XII.



ILLVSTRISSIMO³

PRINCIPI AC DOMI-
no D. Wilhelmo Landgrauio Haf-
sæ, Comiti in Catzenelnbogen,
Dietz, Zigenhain & Nidda, &c.

Carolus Clusius A.

PRODIT in lucē ante
bienniū, Illustrissime
Princeps, CHRISTO-
PHORI A COSTA Burgensis in
Hispania Medici liber, aroma-
tum & simplicium quorundam
medicamentorum in India na-
scentium historiam complectēs.
Eum superiore anno in Bri-
tānica mea peregrinatione ami-
ci cuiusdam opera nactus, non
modò auidē percurri, sed utilita-
tem etiam allaturum censui iis
qui Hispanici sermonis ignari
A 2 sunt,

sunt, si latinum facerem. Quam
fanè prouinciam vt susciperem,
impulit me natura, quæ simi-
lium rerum cognitione mirificè
semper oblectata fuit.

V E R V M, cùm totam histo-
riam cum iis quæ G A R C I A S A B
O R T A multis antè annis in eo
genere cōmentatus est, diligen-
tiùs conifero, pleraque ferè om-
nia ex illis desumpta esse depre-
hendo. Quamobrem & inanem
fore laborem, necnon lectori fa-
stidium pariturum existimaui,
si, quæ in Aromatum historia
G A R C I A E extāt, hīc retexerem.

S E R I E M itaq; capitum im-
mutans, quæ admodum confusa
erat, & totum opus in Epitomen
contrahēs, ea duntaxat latio do-
naui,

naui, quæ apud G A R C I A M non extare, aut paulò aliter ab eo describi animaduerti.

I C O N E S præterea, quas ad viuum expressisse passim gloriatum, suis locis insperferat, reieci, quoniam planè ineptæ essent, & nihil minus, quàm legitimas stirpes referret: vti ex vnica Caryophyllorū arboris effigie (quam idcirco intuli, vt cum legitima, G A R C I A E adiecta, conferre liceat) quilibet iudicare poterit.

Q V I B V S D A M insuper notis nonnulla capita illustraui, vt in hoc genere soleo, præsertim cūm quid simile, vel etiam diuersum apud alios Auctores legere meminim, aut ipsa experientia didici.

T E N V E M porrò hunc labo-

A 3 rem

rem Illustrissimā V. C. benignè
suscepturam certò statuens, ip-
sius nomini cōsecrare non sum
veritus, cū quòd βοτανικὸν stu-
dio summoperè delectetur, tum
vt aliquod saltem grati mei erga
ipsam animi specimen extaret,
pro singulari illa qua me proxi-
mè Cassellis excepit, humanita-
te, atque insigni qua disceden-
tē prosequutus est munificentia.


DEVM autē opt. max. oro, vt
Illustrissimę V. C. omnia prospe-
ra clargiri dignetur. Viennę Au-
strię Cal. Ian. M. D. LXXII.

CHRI-

CHRISTOPHORVS A⁷

COSTA CHRISTIANO ET

PRVDENTI LECTORI.

 MNES homines scire desiderant, inquit Philosophus principio Metaphysices. Tanti apud me fuerunt ponderis ea verba, beneuole lector, vt, relicta patria, per varias regiones & prouincias, sapientes & curiosos quærere instituerim, à quibus singulis diebus aliquid noui ediscere possem: quẽadmodũ olim fecerunt multi prudentes viri, referente D. Hieronymo in Bibliorum præfatione ad Paulinum.

CVPIDVS itaque fructũ aliquem colligendi ex meis longis peregrinationibus, curauit, vt diuersis in regionibus & prouinciis, plantarum, quas Deus ad humanam salutem creauit, varietatem obseruarem.

PORRO in Orientali India, in D. Garciam de Orta, Medicum Lusitanum incidi, virum grauem, rari & excellentis ingenij, cuius laudes prætereo, quoniam tantæ sunt, vt cùm multas enumerasse existimarem, multò plures me subterfugerent.

SCRIPSIT is librum Lusitanico sermone, cui titulum fecit *Colloquia de Simplicibus, Aromatibus, & Medicamentis In-*

dia, tum de quibusdam fructibus istic nascentibus. Vt autem eo libro de variis medicamentis, plantis & aliis rebus humanæ salutis necessariis agit: nonnulla etiam vsibus humanis inutilia attingit, Dialogismorum natura ita postulante, vbi collocutores plerunque diuertere, & extra septa ferri consuevere. Sed & plurimi errores passim occurrunt, quos tametsi Auctoris existimatio & laus ipsi tribuendos minimè patiatur, sed typographi & operarum (quæ in ciuitate Goa, vbi ille scripsit, non adeò cultæ & expolite inueniuntur vt in his regionibus) potius negligentia: lectori tamè molestia & tædiū pariunt. Aliud præterea libro deest, quò minus omnibus numeris absolutus censeatur, nimirū picturæ & platarū de quibus agit effigies: quas grauioribus & maioris momenti, vt credibile est, rebus occupatus, inferere nō potuit.

CETERVM nostris hominibus eum librum multum profuturum existimabam, si ad earum rerum quæ in eo bonæ continentur, notitiā perducerentur, subiectis ob eorū oculos exemplis & picturis: neminem autem id facile præstare posse, nisi qui eas suis oculis conspexisset, & expertus esset. Itaque patriæ prodesse cupiens, & in meos proximos amore compulsus, eum laborem in me recipere, & singulas stirpes integras ad viuum exprimere constitui, multis aliis rebus additis, quas ipse conspexi, Doctor verò
de Or-

de Orta ob iam dictas causas non potuit.

Non me fugit quanto me periculo exponam, præsertim hoc sæculo, quo hominum nequitia plurimum imperat, & ea plerunque reprehendere solet quæ non intelligit. Sed id me consolatur, quòd plurimos sapientes viros eodem vado trāsisse certū sit: quos si eiusmodi metus deterruisset, multa hodie ignoraremus, quæ summa industria, ingenij felicitate, & diligentia, in bonarū literarum cōmodum posteritati reliquerunt.

Et licet cum iis minimè sim cōparandus, meaꝫ audacia eo maior appareat, quòd de nonnullis erroribus agere instituā, qui inter Græcos, Arabes, & Latinos circa plantarū & aromatū cognitionē cōmissi sūt, partim eorū negligētia, partim etiā quòd eorū medicamentorū natales cōspicere nō potuerint, sed ex incertis aliorum relationibus dūtaxat exceperint: venia tamē non indignus cēsebor, si de his quæ meis oculis cōspexi, certissima & verissima hoc libro cōprehendere coner.

Vt verò hunc laborem susciperem, gloriæ cupido non me impulit, aut vt doctrinæ maior laus quàm mereor mihi tribueretur: sed vnicus mihi scopus fuit, vt tuis cōmodis sincerè inseruirem. Certò autē mihi persua-
deo, etiā si vtilitatē minus fortè laudes, boni tamen consulturū diligentia & laborē, neq; improbaturū meum animū, qui tam lōgis & variis peregrinationibus ea cōspicere volue-

rim, quæ alij ex solo auditu descripserunt.

N E C inficias eo, quin hæc elegantiore stilo tradi queant: verum certâ veritatē expolitis verbis longè præferendâ esse censeo. Eam ob causam te rogo meam voluntatē, vti decet, excipias, neque operis exiguitate mouearis: nam licet moles exigua sit, magna tamen in eo continentur. Quod si quædâ occurrent, quæ tuo palato nō arrideant, ea tanquā prudens omittito, & illud cogitato me tibi soli non scribere, totq; esse opiniones quot sunt homines: namq; fieri poterit, vt quæ tibi ingrata erunt, alij probent. Id si effeceris, curabo vt aliū maiorē librū in mediū proferam, reliquas herbas, stirpes, fructus, aues, animaliaque cum terrestria tum aquatica, quæ in illis prouinciis, tum etiam in Perside & Chinârū regione inueniūtur, hætenus ad viuum non expressa, & de quibus parum admodum scriptū est, cōplectentē: alia item obseruatione digna, quæ tibi forsità magis arridebunt.

F I N E M itaq; faciam, in omnibus doctorum virorū & candidi lectoris censuræ me subiiciens, qui ea duntaxat quæ norunt, aut quæ decet reprehēdere solent. Eos verò qui inuidiæ stimulis agitati contrarium facient, obsecro, vt sumpto calamo primū aliquid scribant quod in lucem proferant: tum demum enim intelligent, quanto facilius sit carpere, quàm bene scribere quod omnium oculis exponendum est. V A L E.

CHRI-

CHRISTOPHORI

A C O S T A

Aromatum liber.

DE ALOE.



FOLIORVM Aloës vsus familiaris admodum est ad aluum purgandam in prouincia Malabar; exhibenturq; sine metu non modò pueris, sed etiam grauidis mulieribus in hunc modum:

Foliorum Aloës vsus.

Malabar prouincia.

FOLIORVM vncias tres in frustra secant, & additis duabus drachmis crassioris salis, lento mitiq; igne coquuntur donec seruere incipiant, colantur, colaturæ additur sacchari vncia vna, totaq; nocte sub dio relinquitur; postridie manè circiter sextam propinant frigidam istam aquam ei quem purgare volunt, somnoq; abstinere iubent, deambulationem verò per cubiculum permittunt, vt celerius medicamentum operetur: tribus deinde horis ab aqua hausta, quatuor vncias iusculi gallinacei cum aliquot granis Masticis exhibent: post horam edit & bibit vinum dilutum. Porro augetur vel minuitur dosis foliorum & colaturæ pro eorum qui id medicamentum sumpturi sunt natura & viribus: neq; minus familiaris est hec purgandi ratio (præsertim delicatulis) quàm Manna aut Cannæ fistulæ recens pulpa; & quod magis mirum est, reliqua officinarum medicamenta præ isto respuunt.

Foliorum Aloës confectio ac dosis.

Et eã sumendi ratio.

CETERVM eodem ordine, quo nos in Europa, Indici Medici purgantia medicamenta exhibere solent, siue solidioris, siue liquidioris sint substantiæ, videlicet ipsa auro-
ra, &

4. Primi.

Quæ possunt
id medica-
mentum e-
tiam iuuare.

ra, & deinde quinq³ horis ab esu, potu, & somno abstinent.
Quo tempore si non purgabitur ager, ex Auicennæ præcepto
Mastiches drachmas duas stillatitia rosarum aqua dissolu-
tas ad roborandum ventriculum dant, aluumq³ inungunt
bubulo felle, lineosq³ pannos felle madentes ventri imponūt,
ad proritandam expultricem facultatem, si necesse sit. Si
verò bene purgabitur, post quinque illas horas à sumpto me-
dicamento, tres vncias iusculi gallinacei tepidi exhibent,
preterea nihil, deinde vt aliquantulum dormiat permittūt,
& paululum aquæ rosacæ bibat: etenim à somno subsequi
solet commoda purgatio, atque plurimum roborari asserūt
facultates naturales, iusculo illo, somno, & aqua rosacea.
Nam si liberalior permetteretur pastus, naturalis facultas
in eo concoquendo occuparetur, tardioremq³ purgationem
moliretur.

223. tract.
2. cap. 23.

HIC est vsitatio medicandi modus inter eruditiores
Medicos earum Prouinciarum, qui rationi maximè con-
sentaneus est: etenim fel foris adhibitum solutiuum est, ir-
ritando expultricem facultatem. Carnium verò esus non
concessus fulcitur auctoritate Auicennæ.

DE OPIO.

Opij vsus,
vbi & cuius
rei commo-
dus.

VVLGATISSIMVS est apud Aphricanos & Asia-
ticos Opij vsus: & eius esui ita assueuerunt, vt etiam absti-
nere eo nequeant sine manifesto vitæ discrimine. Id ipsa ex-
perientia comperi dum Indico mari in Lusitaniam redi-
rem. Etenim eadē naui vehebantur captiui Turcus quidam
natus in Aden, & alij quidam cum Turci, tum Persæ &
Arabes, qui clam aliquantulum Opij secum detulerant,
quo propter penuriam veluti medicamento vsi erant. Eo
absumpto, Turcus ille Adensis ad me, Heus tu, inquit, quan-
do quidem curandorum ægrorum in hac naui prouincia ti-
bi data est, certò scias, nisi mihi & meis sodalibus Opium
præbueris,

præbueris, biduū nos non superuicturos. Cū verò negarem Opium me habere, respondit: Illud ergo esto vnicum remedium, quo nos, qui Opij esui assueuimus, liberari queamus, si singulis diebus manè vnicuique puri vini haustum propines, licet nobis admodum arduum sit & tadiosum, quòd nostræ legi aduersetur: sed quoniam nostræ salus ex eo dependeat, necessariò ferendum est. Ex illius itaque præscriptio vinum omnibus dedi, liberatiq; sunt, & intra mensis spacium, vinum amplius gustare noluerūt, nec illis obsuit Opij defectus, cuius vsus iam in desuetudinem abierat: imò cū illis deinde & vinum & etiam Opium dare vellem, neutrum cupuerunt.

DE LACCA.

LACCAM verò in puluerem redigere solent eius regionis incolæ, deinde colliquare admiscereq; quem cupiunt colorem, rubrum, viridem, nigrum, luteūmve; postea vel in bacillos tenues conformant, quales sunt qui in Hispanias adferuntur ad obsignandas literas, vel in maiores & crassiores, ad vsus mechanicos. Nam qui torno lecticas, sedes, vel alia quæuis ex ligno cōficiunt, si colore inficere cupiunt, solent ea in torno versare, crassioresq; bacillos Laccæ admo- uere, quæ celeri illo motu liquecente ligna elegantē Laccæ colorem recipiunt multis annis durabilem.

Laccæ conficiendæ ratio.

Et eius utilitas.

AVRI fabri autem & argenti fabri vasa sua vacua (vt firmiora, elegantioraq; reddant) Laccæ puluere implere solent, eaq; deinde igni admouere vt Lacca lique scat, postremò refrigerari sponte sinunt, vel aquæ immergunt.

CETERVM adulteratur interdum resina & cera: sed adulteriū facile deprehenditur ex odore & mollitie si frangatur aut vratur.

Quomodo adulteretur.

PORRO Laccam non esse Dioscoridis Caucamum, vt Serapio arbitratur, Amatus Lusitanus Commentariis in primum

Lacca nō est Dioscoridis Caucamum

primum librum Diosc. enarrat. 23. probè annotavit, ubi duo Lacca genera describit his verbis.

Caucamum
à Lacca di-
gnoscenti
ratio.

Dialacca.

Lacca artifi-
cialis.

Et eius usus.

QVICVMQVE Caucamum Laccam esse putarunt, mirè errare deprehenduntur: cum Caucamū gummi odoriferū sit, Lacca verò siue coimmanfa, siue suffimentis expetita inodora percipiat: quam hodie Lusitani ex India adferunt rubram, translucidam, tincturis præcipuè deservientem (ex ea Officinæ compositionem quandam præparant, Dialaccam appellatam) quæ ut certò scimus, non gummi, aut arboris plantæve alicuius gutta est, sed potius formicarum alatarum stercus fauagove, velut cera apum, &c. Et paulò post:

EST verò alia Lacca artificialis, quam infectores pannorum vendunt, quæ ex fece Brasili, Verzinij dicta & cocci resultat: quam pictores pro conficiendo colore rubro obscuro maxime utuntur. Hæc verò Serapio ineptè admodum cum prima confundit Lacca: unde hodie multi impudentissimo errore, Serapionis autoritate seducti, eam in compositione Dialacca miscent.

DE CAPHURA.

Tabellæ ex
Caphuræ li-
gno confe-
ctæ.

Caphura de
Burneo præ-
ciosior Chi-
nensi.

Cate.

Bar.

HABVI tenues admodum fritilli tabellas, cum pyxide qua adservabantur, ex Caphura ligno confectas, uti ex odore facile deprehendi poterat: nunquam tamen Camphoram exsudabant, at si manibus tractarentur, solummodo Camphoræ odor in eis maior spirabat.

PORRO Caphura de Burneo cum multò plurius æstimetur, præstantiorq; sit Chinesi; per Cates (est verò Cate poderis genus viginti uncias pendens) veditur, Chinensis autem per Bares, estq; Bar pondus circiter sexies ceteras libras pendens. Valet etenim eius quæ ex Burneo aduehitur libra una, quantum Chinensis centenæ libræ.

CVM itaque illius tam vile sit pretium, planè explo-
Rex China. denda eorum est opinio, qui illam à Rege Chinarum adul-
terari

terari arbitrantur, quandoquidem vnus sit ex potentissimis
totius orbis Regibus: de quo eiusq; provinciis si quis sermo-
nem instituere cuperet, magnum volumen conscribat opor-
teret. Nam si Regni amplitudinem, incolarum frequen-
tiam, politia & gubernationis excellentiam, & diuitias spe-
ctes; nullum aliud in vniuerso orbe est Imperium quod
cum Chinensi comparari possit. Et haud scio an quispiam
tam confidentis sit ingenij, vt eorum quæ istic excellentia,
& perpetua memoria digna sunt, historiam conscribere ad-
gredi audeat, cum omnia longè famam relationemq; om-
nem superent. Si quis tamen partem infinitatis eorum quæ
in China obseruata sunt, scire cupit; legat librum quem de
ea conscripsit Reuerendus pater Gaspar de Cruce Domini-
cani ordinis monachus.

rum poten-
tissimus.

Et regni præ-
stantia.

Gaspar de
Cruce Chi-
nensis histo-
ria auctor.

Vt verò è multis mercibus quæ ex Chinarum regione
aduehuntur paucas perstringam, sunt argentea vasa diuer-
si generis summa arte & diligentia elaborata, omnis præ-
terea domestica supellex, vti lectica, sponda seu lectuli ad
recumbendum ex argento sculpto & diligenter elaborato:
maxima quantitas sericei filii, sericeorumq; pannorum, plu-
rimum aurum, moschus, vniones, argentum viuum, es, mi-
nium, murrhina vasa plurima, quorum nonnulla duplo esti-
mantur argenti pondere, & pleraque alia cum ad huma-
nos vsus necessaria, tum ad luxum & ornatum. Ego sa-
nè inde habui binas thecas ex solido argento cum omni-
bus instrumentis chirurgicis maioribus & minoribus, vt sunt
cauteria, specilla, malleoli, &c. ex argēto confecta & exor-
nata summo artificio, vt nullus argēti faber non miraretur.

Merces quæ
ex Chinarū
regione ad-
uehuntur.

DE MANNA.

PRÆTER ea Manna genera quæ à doctissimo ab
Orta descripta sunt, aliud in Ormus venale conspicitur,
quod in varias India prouincias defertur, quodque glebis
paulò

Mannæ ge-
nus in Or-
mus venale.

Et eius fa-
cultates.

paulò maioribus constat quàm Calabrina, neque ita candidat; id valèter purgat, & quoniam magis solutivum est reliquis generibus, minorisq; est pretij, vulgus præfert, eoque plurimum utitur. Diligentissimè autem ab humiditate conservari debet, alioqui facile corrumpitur. Compositum autem esse medicamentum, sic deprehendi.

Eius conservandi ratio.

Cochin civitas.

Eius mannæ compositio.

Dante.

Manna adulteratur.

MULTUM eo utebatur Medicus quidam Brachmanes meus familiaris, degens in civitate Cochin, atque summè à bonitate commendabat, negans pretij vilitatem imminuere eius præstantiam; vileris idè pretij aestimari, quoniam maior quàm reliquorum generum illius inveniretur quantitas: Cum verò compositum aliquid mihi videretur, suspicari cœpi eum id in suis ædibus conficere: semel enim resciveram omnino Manna eum carere, paulò verò antè mihi dixerat ex Ormus ad ipsum aduehi, paucis tamen interiectis diebus maximam illius recentis mihi ostenderat quantitatem, cum & hyems esset, nullaq; naues ulro citroq; nauigarent. Tandem bonus Brachmanes (accepta à me silentij fide, quòd in illis saltem provinciis eum minimè proditurus essem) fassus est à se componi ea quam in Persia observarat, ratione, videlicet, Amylum candidum & purissimum, Mannam cuiuscumque generis, sed præferim quæ Calabrinam æmuletur, Scammoneam & seminis genus Vissa dictum, quod ex Bengala aduehitur, quòdque Lathridis grano simile est, (iniecto interdum polline radice cuiusdam candidæ lacticinæ, cui nomē Dante,) cū Saccharo, paucillaq; aliqua odorata aqua permiscebat, soliq; exponebat.

MANNA autem adulterari nihil mirum, quandoquidem & lapides Bezaheares tanto artificio in Ormus & in vrbe Cochin provincia Malabar, vbi Rex degit, adulterantur, ut legitimi appareant, fallantq; etiam maximè expertos in iis dignoscendis, prima superficie, quæ nisi frangatur, vix à legitimis discerni queant.

DE TABAXIR.

INVENIUNTUR interdum he arbores siue arundines vocata Mambu in quibus nascitur Tabaxir, tantæ amplitudinis & crassitiei vt ex ea cymbas faciant, quæ binos viros capere possint, non quidem eas excauantes, sed relictis solum duobus internodiis excidentes; Conscendere verò solent similes cymbas bim Indi, iug³ nudi (nam nudos incedere in iis regionibus moris est) sedereq³ singuli in eius extremitatibus, iunctis cruribus, tenentesq³ singulis manibus remos trium aut quatuor palmorum longitudinis, quibus eas cymbas impellunt tãta dexteritate, vt etiam aduerso rapidoq³ flumine summa celeritate nauigare possint, quemadmodum meis oculis conspexi in flumine Cranganor, in quo plurimus est vsus cymbarum ex hac arundine confectarum, quoniam qui eis vehuntur securiores sese existimant à Crocodilis, quos illi Caymanes vocant, magno numero in eo flumine versari solitis. Nam cum ij ferocissimi sint, sæpenumero in naues maiusculas & minusculas impetum facere solent, vt eos qui illis vehuntur apprehendant: Si enim aut in flumine aut in littore hominem, bouem, bubalum, aprum, porcum, aut quodcumque tandem aliud animal comprehendere possint, illico deuorant. Indigenæ autem affirmant nunquam compertum esse, vt eos qui cymbis ex Mambu confectis vehuntur appetant, sed sæpenumerò conspectos esse natantes proximè illas, attamen eas præterire sine noxa.

Tabaxir historia.

Mambu.

Eius utilitas.

Cranganori flumen.

Crocodili.

Caymanes.

DE ELEPHANTE.

MINISTERIVM præstant Elephant non modò in conuehendis oneribus & bellicis tormentis è loco in locum cõmutandis, sed etiã in muniis aliis domesticis. Promiscide verò (qua veluti manu vtuntur) onera crasso firmoq³ fune colligare solent: funem verò ore apprehendentes, eum sannis

Elephantum ministerium & historia.

seu dentibus quos exertos habet, quoties opus est circumuolunt, deinde onera sublimia in aëre ferunt, aut trabunt, si nimium graua sint, tanta dexteritate & attentione, (praesertim si iis contineantur res fragiles, & quae effundi possint) ut huiusmodi res requirunt: nec, cum semel iter confecerant, via demonstratore amplius opus habent, tanta sunt memoria praediti.

PLINIVS lib. 1. multis locis plurima de Elephantis memoratu digna refert: at nos nonnulla hic describemus magis fide digna.

Elephantes
se mutuo
intelligunt.

Aliquando
loquuntur.

VULGARIS opinio est in prouincia Malabar Elephantos mutuo se intelligere. Loquentum autem aliquando in vrbe Cochim (quae illius prouinciae nobilis ciuitas est) publico testimonio constat hoc modo.

ELEPHAS quidam in littore maris vrbi vicino laborare solitus, iamq; laboribus fessus, domum redire properabat, ut quiesceret: Praefectus vero illius vrbis orabat illum ut in labore pergeret, atque liburnicam quam iam commouere inceperat, in mare traduceret: reuocentem Elephantum Praefectus denud compellare, blandisq; verbis demulcere coepit, id in suam gratiam faceret, ita enim decere, quandoquidem in seruitium esset Christianissimi Regis Lusitania: Elephantis haec duo verba proferens, hoo hoo (quae lingua Malabaria, vulgari & vsitata in ea prouincia e qua Elephas oriundus erat, significant, volo volo,) ad liburnicam rediit, eamq; in mare impulit.

IDEM cum ipsius rector hora constituta cibum illi non preberet, de mora conquestus est: rector vero id accidisse aiebat, quod lebes in quo cibum illi coquere solebat, pertusus esset, proinde eum ad Cacabarium deferret resarciendum: fert eum elephas: cacabarius negligentius reparat: rector elephantum obiurgat, eumq; contumeliosis verbis afficit, atque ad cacabarium cum lebe remittit ut diligentius resarciat:

ciat: is verò de industria lebetem reparare simulans, rimans
 auget & elephanto reddit; qui lebetem promuscide sumens
 ad flumē defert & aqua implet, quam dum effluere conspi-
 cit, magis pertusum esse lebetem intelligit, & ante cacaba-
 rii ades refert magno barritu intonans: concurrunt Regio-
 rum negotiorum Præfectus & alij multi: cacabarius blan-
 dis verbis veniam ab elephanto petens lebetem probè repa-
 rat, eiq; restituit: ille verò minimè ei fidens, in omniū con-
 spectu ad flumen redit, aquamq; haurit; quam dum videt
 non effluere, lebetem ostendens adstantibus, quasi eos rei
 gesta testes esse cuperet, ad rectorem suum refert.

NATURA gratus est, beneficiorūq; memor, nec cui-
 quam nocet nisi iniuria affectus, aut dum certo morbo cor-
 ripitur quo veluti in furias agitur, quod singulis annis fieri
 solet: tum enim nemini parcunt elephanti sed obuiū quem-
 que proterunt.

Elephanti
 beneficiorū
 memores.

Elephanto-
 rū morbus.

ACCIDIT in vrbe Goa, in qua legati Regis Lusitaniae Goa vrbs.
 qui regiam potestatem obtinent degere solent, vt vnus ex
 elephantis qui istic ad Regis seruitia alūtur huiusmodi mor-
 bo correptus, vincula & catenas (nam solent ferreis catenis
 cōstringi & loco quodam concludi donec morbo liberentur)
 disrumperet, & per urbem vagaretur; fugientibus verò om-
 nibus, mancipium quoddam in vlnis filiolū gestans in pla-
 tea obuiam habuit, quod conspecto elephanto exterritum ad
 suas ades celeri cursu cōsugit, quas vt aperiret filiolum hu-
 mi ante ianuā exponit, moxq; ades ingressum ianuā occlu-
 dit, præ metu filiolū oblitum: elephas puerū conspiciens, pro-
 muscide leniter subleuans, in proximum humile tectum,
 quod è regione istarum aediū erat, collocat, atque aspicit an
 puer istic sine dāno cōsistere queat, deinde furibundus vltè-
 rius progreditur: beneficij memorē, tamen si furēs, sese osten-
 dit hic elephas, qui puerum non necauit, sed agnouerit fi-
 liū eius mulieris esse quæ eas ades in habitabat, quæq; illi &

aliis domesticis elephantis quotiescumque istac transirent, panem aut fructus dare solita erat: nam huiusmodi cibos & alia edulia ante suas ades venalia exponebat.

ALIUD gratitudinis exemplum referam. In eiusdem urbis foro vagabatur huiusmodi furus correptus elephas: vir quidam ager effugere cupiens pronus cadit; elephas minime ei nocens promuscide comprehendit, & in scamno quodam deponit. Aiebat hic vir, eodē loco, illi ipsi elephantio, antequam in morbum incideret, magnū quendam fructum Iaca fructus. Iaca incolis appellatum (de quo nos inferius) sua manu prebuisse.

APUD urbem Cochīn elephas quidam huiusmodi furis agitatus in lacuna quadam harebat, ad quam cum forte accessissent inopinanter nonnulli pueri, Elephantē conspecto omnes diffugerunt præter unum qui istuc perstitit: eum accedit Elephas ad blandiens quodammodo, & promuscide demulcens, leniter eum corripit, suoq; dorso imponit, & per lacunam expatiatur, deinde illum reponit quo apprehenderat loco veluti letabundus. Cum ea quæ ipsi accidissent puer narraret, multi viri eum comitati sunt: sed procul à lacuna remanentes, arbores conscenderunt, ut tuto spectarent quid ageretur. Puerum propius accedentem elephas velut antè corripit dorsoq; imponit, & expatiatur. Id sæpius à puero est repetitum, donec blandis verbis (quemadmodum edoctus fuerat) elephantum denuò mansuetum redderet, & in urbem pelliceret.

Morbi siue
furoris indi-
cium & re-
medium.

ANTE verò quàm huiusmodi aegritudine & amoris furore corripiantur Elephantī, eos sui rectores in agros deducere, atque istuc validis firmisq; catenis ferreis constringere solent: furoris enim indicium agnoscūt ex quadā oleosa materia, quæ ex illorum auribus effluit. Medicantur autem huic aegritudini ipsorum rectores, graviter illos obiurgando, & rationibus demonstrando (probè etenim audiunt & in-

& intelligunt) vilis & degeneris esse animi ob amorem ita in furias agi: deinde certa quaedam medicamenta illic vsitata adhibent. Maxima eorum castigatio est, grauibus verbis illos obiurgare; tametsi interdum anteriores pedes subleuare eos iubeant, plantaſq; cum hamulis feriant, dicentes sese eos vti pueros castigare ob stultitiam.

GLORIAE auidi sunt elephāti, cuius causa interdum Gloria auidi. mira facinora præstare conspiciuntur. Nonne in littore vrbi Goa vicino quidam crepuit medius dum solus magnum aneum tormentum bellicum subleuare cupit? quoniam ipsius rector grauibus verbis obiurgasset & contumelia affecisset, ostendens illi duos iuniores elephantos aduentantes illius anei tormenti tollendi gratia?

CETERVM vti beneficiorum sunt memores, & glorie auidi, non minus vindictæ cupidi esse deprehenduntur; quem admodū ea quæ in vrbe Cochīn acciderunt documento esse queunt. Vindictæ cupidi.

MILES quidam Cocci siue Indicæ nueis putamine domesticum elephantum petiit, cumq; in fronte attigit: elephantus putamen colligit, & cum eo tempore iniuriam vlisci minimè posset, in os recondit, donec elapsis aliquot diebus militem in platea quadam deambulantem conspiceret, tum demum promuscide nucis putamen ore eximit, atque militi vicinior factus, in ipsum cōijcit, deinde abit, veluti lætus quòd iniuriam sibi illatam vltus esset.

ALIVS quidam miles in eadem vrbe Elephanto suum rectorē iniuria affecisse visus est, quòd ei in via minimè cedere voluisset: eam iniuriam vlisci cupiētem rector vetuit. Post aliquot dies ministeria quaedam in littore Mangate fluminis (quod vrbem Cochīn alluit) absente suo rectore obiens, militem cum aliis quibusdam sermones conferentem conspicit, promuscide eum corripit; nec eorum qui ipsum rogabant vt militem dimitteret, voces moratus, aliquoties

flumine mersit, subinde eum in altum subleuans & aquam qua madebat defluere sinens: deinde cum iniuriam suo rectori illatam probe vltus sibi visus esset, militem quo comprehenderat loco denuo in pedes sistit.

LONGE plures similes historias veras hic recensere possem, quas breuitatis causa pretereo. Quibus vero ista non sufficiunt, legant quæ Aristoteles, Plinius, Aelianus, Oppianus, & alij plerique Auctores de Elephantis scripserunt.

DE CANELLA.

Canellæ historia.

CANELLÆ arbor mali aureæ amplitudine est, nonnunquam maior, interdum minor, ramosa admodum, cuius teneriores rami recti sunt: folium Laurino simile, latius tamen, colore dilutiore, & minus siccū, tribus nervis insignitum: flos candidus, odoris propemodum expers: fructus siluestris oleæ baccis par, virescens initio, deinde rufescens, & ubi plenam maturitatē consequutus est, niger atque splendens (quo tempore colligi debet) ossiculum intus continens siluestribus oliuis simile, similique carne præditus, ex qua extillat oleaginosus quidam liquor subvirescens, odore baccarum lauri, sapore acri cum pauxillo amarore coniuncto: præditus verò est hic fructus sessili parte paruo calyce, leuiore minisque crispo quàm sint ilicis calyces. Harum arborum magna est frequentia in siluis prouincia Malabar: sed præstantia & odore longè sunt inferiores iis quæ in Zeylan insula nascuntur.

Canellæ liquor.

Et eius facultates.

STILLATIVUS Canellæ liquor vitreis aut plūbeis organis extractus is præfertur, qui è viridi cortice, præsertim radicū, minutim inciso eductus est: etenim nō modo corroborat & stomachi imbecillitatem, colicæ dolores ex frigida causa prouenientes lenit: sed vrinam cit, & oris anhelitum commendat: vtilis est præterea iecoris, splenis, cerebri & nervorum ægritudinibus, atque in syncope cardiacis affecti-

affectibus confert: venenis resistit & virulentorum animalium morsibus; menses mouet, & vteri affectibus prodest, vomitiones cohibet, & appetentiam excitat: valet item ad spasmos, & comitiales morbos: atque vt summam dicam, aperit, incidit, digerit, calescit & corroborat.

ELICITVR etiam liquor ex Canelle floribus, sed longè minore quantitate, minùsque præstans superiore.

DE SANTALO.

ODORATI illius ligni genus in Malabar natũ Santalo albo persimile quo se in febribus indigenæ inungunt, & Sambarane appellant, non est Santalum, neque eius facultates obtinet: Medici tamen eius provincie Santali speciem esse, & cõserre tenuioris fortunæ hominibus asserunt, commendantq; in Erysipelate, & inflammationibus: atque Santali rubri modo eo vtuntur.

Sambarane.

Santali species.

Ad erysipelas & inflammationes utilis.

* Flauī Santali selectissimi libræ fragmentum, mihi liberali munere dedit noster Hugo Morganus Londinensis Pharmacopola peritissimus 1581. Est verò id graue, solidum, nodolum, colore intus flauum, odore suauī cerebrum reficiens, & grato sapore palatum leniens.

Flauī Santali fragmentum.

DE BETELE.

BETELE planta Piperis stirpi aded similis est sarmentis, foliis, & nascendi modo, vt quando simul sunt satæ, vix è longinquo dignosci queant ab his qui plantarum istarum minus sunt periti: scãdit enim & amplectitur arbores iuxta quas sita est, Piperis modo: eius verò folium Piperis folio crassius est quidẽ, at magnitudine & neruis siue fibris prorsus simile.

Betele historia.

DE MACI.

FIT in insula Banda ex Maci oleum admodũ commendatum

Bãda insula.

Oleum ex

Maci & eius
utilitas.

Ex nuce
moschatali.
quor & vi-
res.

Varia no-
menclatura.

Macis à Græ-
corum Ma-
cere diffe-
rentia.

datum in nervorum affectibus & aliis frigidis morbis.

ELICITVR & ex nuce moschata trita, calefacta, & prælo expressa liquor admodum suavis & utilis in nervorum frigidis affectibus: thoracem etiam & pulmonem lenit, inde clariorem vocem reddit, impinguat & sperma auget.

ARABES nucem ipsam Iausiband, & Seygar appellant: Macim verò Bisbele, & Besbaca, quod vocabulum propriè nucis corticem significat, Persæ arborem Drach nuncupant, Turcæ Agache: Macis autem oleum Arabibus Geusifami, Persis Geuzi erugaât, Turcis Geuziat dicitur.

PORRO hunc Macim à Græcorum Macere plurimum differre minimè dubium est si utriusque historiam & facultates expendamus. De Macere autem proximo capite sumus acturi.

* Vidi aliquando Vlyssipponæ oleum de Maci ex India magnis fictilibus delatum, quod magno æstimabant, atque in ventriculi frigidis morbis plurimum commendabant. Id verò erat inspissatum & saponis gallici ferè modo in tabellas vnciam propemodum densas, tres verò latas, totidemque aut amplius longas efformatum, pingues, subflavas, odoratas. Vidi etiam hoc anno 1581. Londini apud M. Hugonem Morganum Pharmacopœum eruditum, & diligentissimum, eundemque virum perhumanum & optimum, eiusmodi oleum recens ex India delatum, cuius aliquot panes siue tabellas, oleum balsami è nouo orbe, oleum de liquido Ambar, aliæque rariora quædam simplicia ipsius liberalitate cōsequutus sum.

DE MACERE.

Maceris hi-
storia.

Insula S.
Crucis.

NASCITVR quibusdam Orientalibus insulis, præsertim verò in prouincia Malabar, in insula S. Crucis regni Cochintum in ripis fluminis Mangate & apud Cranganor vasta quædam, & multis ramis prædita arbor Vlmomultò maior, cuius folia in longitudinem sex aut septem vncias longa sunt, duas lata, exteriori parte dilutius virentia interiore saturata: Ea non alium florem, non alium fructum

Etum habere creditur præter semen quoddam denarij magnitudine, tenue, cordis effigie, colore flauo, sapore verò amygdale. aut nuclei persicorum malorum, tenui & candida tunica tectum, quod vesica quadā ex tenuissimis duabus simul iunctis & transparentibus membranis constante includitur: ea autem vesica in medio folio nascitur alius magnitudine non dissimili, sed cuspide obtusiore, & circa pediculum angustiore, colore medio inter rubrum & saluum, inequali, & multis fibris à pediculo ad extremitatem recta linea ductis, crispo & rugoso, haud absimilis illi quæ in Ulmo nascitur, paulo tamen latior & planior.

Succo lacteo prædita est hæc arbor vti Morus, radicesque habet illi persimiles, magnas, crassas, in latum & profundum diffusas & cortice tectas crasso, aspero, scabro, duroque, cinereo foris colore, interiori albo & lacteo succo prægnante dum recens est flauescente autem dum sicca est, & admodum adstringente: & licet succus ille cum adstrictione nonnihil mordicet; breui tamen euanesceat hæc veluti insensibilis mordicatio. Arenosa & humida loca amat, & reliquas serè plantas circumnascens enecat.

Nomen vulgare huius arboris apud Lusitanos est Arbore de las camaras, & Arbore sancto, hoc est, Arbor dysenterie, & Arbor sancta: ab indigenis Christianis Arbor de sancto Thome, id est arbor D. Thomæ, & Macruyre: à Medicis Brachmenis Macre, apud quos summo in precio est arboris cortex.

Radici cortice recenti trito, & cum oxygala seu lacte acido mixto omnis generis dysenterias & alui profluvia mirabili successu curant omnes Medici cum Brachmenes tum Canarini & Malabarici. Aliqui huius corticis sicci & in puluerem redacti semunciam per noctem macerant in quatuor vnciis feri lactis, eumque bis in die propinant manè & vespèri, deinde medicamento sumpto orizem sine sale &

Radici cortex ad dysenterias & profluvia efficac.

butyro coctam, atque pullos gallinaceos coctos, maceratos & tritos in orizæ decoctione statim egro exhibent: interdum si necessitas urgeat, opium admiscunt roborandi medicamenti causa: solent verò etiam Arabes cuiuscunque generis alui profluvia opio nuce moschata admixta curare.

Ad vomitus
compescen-
dos.

H V I V S item radicis vsus salutaris creditur ad vomitus compescendos, & ventriculum roborandum cum aqua Menthe & mastices puluere.

Ciuitas S.
Crucis.

Macre.

R O G A T V S Brachmenes quidam medicus mihi familiaris, virq; probus, boni iudicii & magnæ existimationis apud omnes ciuitatis S. Crucis regni Cochini incolæ cum gentiles tum Lusitanos, quòd illius fideli opera sæpius vsi essent, vt bona fide exponeret istius corticis quem Macro vocant facultates, in hæc verba respondit: Si vos Lusitani hunc corticem probè nossetis, multò pluris illum faceretis quàm Piper: Sed quoniam istic in Lusitania eius facultates ignoratis, idcirco contemnitis. Puluis quem in omnis generis alui profluvio ex oxygala propinare soleo, ex hoc cortice de quo percontaris cõstitutus est. Eius magnâ quantitatem tibi ostendere domi possem, quam in Bengala & Iapan missurus. Sitne verò inutile medicamentum, tu ipse qui illius effectus plerumque conspexisti, iudicare potes.

Ioque.

H N C corticem etiã ostendi rhizotomo cuidã Ioque (genus quoddam hominum est circumforaneorum qui peregrinãdo pœnitentiã agere sese profitentur in illis regionibus) petiùque vt quid esset (tamen si probè nossem) significaret: respondit ille, eum sequeretur, cuius arboris cortex esset se demonstraturum, ostenditque arborem quàm antè sciueram & addidit, Apud nostros homines appellatur Cura santea macré nistusa garul, hoc est, Macre ab Angelis ostensam hominibus ad ipsorum salutem. Subiunxit insuper istius corticis apud ipsos vsu esse in compescendis vomitibus, aluiq; profluvii sistendis, plúsque pollere huius radicis portiunculam

culam, quàm magnam quantitatem corticis Myrobalanorum aut Arece, eamque præstantiorem esse Coru Malabario de quo proximè dicemus. Referebat præterea Macre fructum omnis generis lumbricos in humano corpore natos necare & expellere, & calculum in renibus frangere: tum etiam eos qui singulis diebus manè eo vterentur, liberos fore à calculo & à coli doloribus, nec inebriari posse.

MAGNA disceptatio est inter Neotericos an Græci Macin & Arabes Macerem nouerint. Negari non potest quin multo plura medicamenta nunc nouerimus quàm veteres: inficiari etiam non possumus, pleraque illis cognita fuisse, de quibus dubitamus. Nam certissimum est, Græcis probè notum fuisse Macer de quo dubitamus, & quod plerique adhuc ignorant: nesciuisse autem Macin & nucem moschatā nobis adprimè nota, vt ex eorum scriptis constat.

GALENVS simplicium lib. septimo Macerē aduehi ait ex India, constare essentia pleraque frigida & terrestri, paucula verò frigida: conferre sua adstrictione aduersus dysenterias & cruentas excreationes.

Vnde Macer
aduehitur
Galeno.

DIOSCORIDES verò lib. 1. cap. 94. Macer qui ex Barbaria aduehitur, est cortex flauescens, crassus, & gustu perquam adstringens, qui contra cruentas excreationes bibitur, dysenterias & alui fluxiones.

Vnde Macer
aduehitur
Dioscoridi.

QVÆ facultates inueniuntur in cortice iam descriptæ arboris, non in Maci odorato nucis moschatæ operculo, quod calidum siccumq; est in fine secundi gradus, aut initio tertij, tenuiūque partium & leuissimi amaroris, pauculaq; adstrictionis particeps: itaque certum est vtrumque loqui de cortice nostræ arboris, non de Maci quod illis ignotum fuit.

ADMONUIT me præterea medicus quidam Regis Cochī, ne dubitarem quin hic cortex Auicennæ Macer esset: magnæq; inscitie esse de re tam aperta disceptare: huius etc.

Hic cortex
Auicennæ
Macer.

ius etenim Macre facultates, eis, quas suo maceri veteres tribuunt, persimiles, facile id demonstrare.

PLINIVS etiam lib. 12. cap. 8. Macer, inquit, ex India aduehitur, cortex rubeus radicis magnæ, nomine arboris sue.

De locis nata
libus Maceris
Diosc. & Galeni
disceptantium
conciliatio.

MINIME verò nos mouere debet quòd Dioscorides ex Barbaria Macerem aduehi asserat, quem Plinius & Galenus ex India deferri scribunt: idem enim illis accidisse potest in hoc medicamento, quod in Cinnamomo & Cassia, ut (quoniam ex peregrinis & longinquis regionibus ad eos adueherentur) eorum natales non fuerint probè cogniti.

Indus flu.

In eo insula
vel vrbs Bar-
baria nomi-
ne.

AIT tamen Ptolemæus: Quedam in Indo fluuio insula vel vrbs sita est, quæ Barbaria dicitur, ex qua facile cõportabatur Macer: vel quòd asferretur ex Arabia eo maris sinu qui à Barbaria insula Barbaricus appellatur. Cui suffragatur Strabo, Omnia, inquit, quæ in India proueniunt, ea scilicet parte, quæ ad Austrum vergit, similiter in Arabia nascuntur.

Macis & Maceris
differentia.

MACIS & Maceris differentia Auicennæ probè fuit cognita, quippe qui Macim odoratæ nucis inuolucrum cap. 456. & Macerem radicis corticem cap. 694. sub titulo Talisfar descripsit.

NON ignota etiam fuit Serapioni, qui ex auctoritate Isach, Macim esse nucis odoratæ operimentum dixit, diuersum ab eo cuius Dioscorides meminit, quippe qui scriptum reliquerit, Macerem esse ligni corticem siue corium.

Qui inter se
differant.

LIQVET itaque Macim & Macerem differre inter se qualitate, substantia, figura, planta & regione, quandoquidem Macer radicū arboris cortex in Malabar nascitur: Macis verò nucis Moschatæ operimentum, in Banda, longissimè inter se distitis. Tametsi Monachi qui in Mesuen cõmentarios scripserunt, asserant non differre, suam negligentiam ista ratione prodentes.

VVLGARIS admodum huius corticis Maceris est Corticis Ma-
ceris vtilitas.
vsus in omnibus nosocomiis prouinciarũ Chinæ, Iapan, Ma-
lace & Bengala, in dysenteris, alui profluuiis, & sangui-
nis reiectionibus, cuius causa ex Malabar vsque petunt.

DE CORV.

IISDEM locis, præter memoratam arborem, nascun-
tur duæ aliæ arbores plurimum inter se differentes, sed quæ
iisdem facultatibus cum superiore sint præditæ.

HARVM prior (de qua hoc capite agemus) vocatur in Coru varia
nomēclatu-
ra.
Malabar Curodapala, & Curo; in Canarin Coru: à
Brachmenis Cura.

EST verò hæc arbor pumilæ malo aureæ similis, cui
etiam persimilia habet folia, sed quæ mediũ neruum cras- Eius historia
sorem habeant, aliis octo aut nouem in latera excurrentibus:
flos luteus est, odoris ferè expers: radicis cortex diluto viro-
re præditus est leuis & tenuis, qui si frangatur aut vulne-
retur, multo lacteo succo manat, lentiore & magis viscido
quàm qui ex superiore fluit, gustu insipido, amaritudinis ta-
men alicuius particeps, frigidus & siccus, plus tamen sicciti-
tatis quàm frigiditatis possidens, in quo ordine Medici illius
prouinciæ etiam constituunt.

HUIVS virentis corticis succo licet admodum ingra- Eius corticis
facultates.
to, plurimum vtuntur incolæ cum gentiles tum Christiani
ob admirandos quos præbet effectus in omni genere profluuij,
cum in lyenteria tum in diarrhoea & dysenteria è quacun-
que causa prognata. Lusitani tamen Medici methodum in
eo exhibendo seruant. Vtuntur etiam eo sicco veluti priore:
sed prioris cortex longè præstat. Distillant verò atque vtun-
tur in hunc modum.

CORTICIS in puluerem triti vncias octo, ammeos, Corticis cõ-
ficiendi ra-
tio.
apij, coriandri sicci, cumini nigri nonnihil tostorum & in
puluerem redactorũ singulorum drachmas tres, corticum
Myro-

Areca.

Myrobalanorum Cepulorū drachmas septem, butyri vaccini non saliti vncias duas, lactis acidi quantum satis est ad pulueres istos excipiendum sumunt in distillatoriam ollam vitream (si delicatioribus paratur) aut vulgarem (vt maxima ex parte sit) imponūt, & stillatitium liquorem eliciunt, cuius quatuor vel quinque vncias cum aqua auellana Indica, vulgo Areca nominata, aut aqua e pediculis rosarum vncis duabus propinant alui profluuiolaborantibus, (interdum, si necessitas vrgeat, trochiscos de charabe vel de Lemnia terra admiscent) semel in die, vel bis si opus sit; illico autem post eius sumptionem, orizam cum oxygala exhibere solent. Clysteres etiam ex eo confecti praesertim sub noctem iniiciuntur.

LICET verò hic liquor admodum commendabilis sit, longè tamen praestantior est Maceris cortex viridis, licet multo ingrator, & sumptu difficilior.

Eius radicis facultates.

VTILIS etiam haec est radix seu cum Orizae decocto sumpta, siue inuncta aduersus haemorrhoides & ani scissuras.

Et foliorum utilitas.

FOLIORVM eius cum Tamarindorum foliis decoctorum vapore crura tumentia utiliter fouentur: ipso autem decocto madentes panni commodè in tympanite applicantur.

DE PAVATE.

Pauate.
Vasaue.
Arbor erysipelas curans.

ALTERA istarum stirpium, tertium videlicet genus earum quae ad alui profluvia vtilis sunt, vulgo in Malabar dicitur Pauate, à Brachmenis & Canarinis Vasaue, à Lusitanis Arbol contra las erisipolas, hoc est, Arbor erysipelas curans.

Eius descriptio.

FRUTEX est non admodum ramosus octo aut nouem pedū altitudinis, cui rara sunt folia, mali aurea minoribus foliis similia, excepta appendice qua carent, vtrinq; eleganti virore

viore praeclata: flos exiguus, candidus, quatuor foliolis praeditus, e cuius medio exit alba fibra cuspide viridi insignis, odore floris Periclymeni, cui procul aspicietibus persimilis videtur; rotundum semen, lentiscini magnitudine, ex viridi nigricans, & ubi maturuerit, nigrum. Caudex & rami cinerei sunt coloris, radix alba & insipida, cum nonnulla tamen amaritudine, odoris propemodum expers.

TAMETSI utilis sit haec planta aduersus alui profluvia, quemadmodum superiores duae, cum illis tamen minime comparari potest, quandoquidem imbecillior est: itaque qui superiores nouit, ea haudquaquam utetur in alui profluiis, at in curando dumtaxat omnis generis erysipelate, & eo praesertim quod e mera bile ortum est; etenim insigni virtute aduersus hunc morbum pollere deprehensum est. Eius utilitas.

TERITVR & maceratur huius plantae truncus siue radix orizae decocto (Canje vocant) aliquot horis quiescere Canje. finitur ut ace scat haec aqua, erysipelas deinde ea inungitur, bibendaque propinatur sufficiente quantitate bis in die, purgato prius ventriculo.

EADEM ratione praebetur radix orizae decocto macerata iis qui iecoris inflammatione laborant, & februm ardoribus: addito autem succi foliorum Tamarindi momento vulnerum labia circumquaque inungi solent ad inflammationes prohibendas, & humorum defluxus cohibendos.

QUONIAM vero iis in prouinciis multo maiore quantitate hoc tertium genus quam secundum Coru nuncupatum crescit, incolae eo vtuntur.

DE CARYOPHYLLIS.

ARBOR Caryophyllos proferens magnitudine & forma Lauri est, sed superiore parte magis ramosa, minore & angustiore folio: copiosos fert flores, initio candidos, deinde virides, cum nunc in fructum efformati sunt; at ubi maturuerunt Arboris Caryophyllos proferentis descriptio.

CARYOPHYL. ARBOR.



inruerunt, rubros; qui deinde collecti & siccati nigrum colorem contrahunt: nascuntur ficus * modo sparsim per ramos ad foliorum basim bini, terni aut quaterni simul iuncti, vel vnicus interdum.

DICITVR Arabibus, Persis & Turcis Caranful, Varia nomenclatura.
ipsa arbor Siger, folium Varaqua.

PAVLVS Aegineta acres illos constituit, calidos & siccos ordine tertio: alij dumtaxat secundo.

VENTRICVLVM, iecur & cor roborant, con- Eorū facultates.
coctionē iuuant, vrinas cient, aluum cohibent, oculis instil-
lati eorum aciem exacuunt, nubēsque extergunt: & qua-
tuor drachmarū pōdere ex lacte sumpti venerē extimulant.

* Caput de Caryophyllis Latio donare nō cōstitueram quan-
do quidem pleraque omnia ex Garciae ab Orta historia Aro-
matum (vbi ferē reliqua, de quibus hic auctor hoc volumine
agit) delumpta sint. Quoniam verō prāter reliquorum au-
ctorum, qui Caryophyllorum historiam descripserunt, senten-
tiam, eos ex ramis inter folia, ficuū modo nasci asserit, ipsius
verba lectori proponenda censeui, vt animaduertere queat
quā parum fidei interdum huic auctori sit adhibendum,
qui veritatis assertorem se gloriatur, & plantas ad viuam ex-
pressisse asserit, cū tamē ipsius icones nullius stirpis viuam
effigiem imitentur, prāsertim earum quas hactenus nobis
videre licuit. Caryophyllorum certē legitur am iconem in
Aromatum Garciae historia exhibui, ex ipso ramo muria con-
dito (quales multi Antuerpiam aduehi soliti erāt) à diligenti
& perito pictore expressam. Vidimus insuper hoc anno 1581
Caryophyllorū ramos dodrātales & pedales siccos à F R A N -
CISCO DRACKE nauclero Anglo (qui vnīuersum or-
bem circumnauigauit) ex Moluccis superiore Septembri de-
latos: sed omnes extrema parte fructus proferebant suis fe-
stucis aut bacillis inhaerentes, eo quem in nostra icone exhi-
buimus modo. Eam tamen quā noster Auctor expressit, hoc
etiam capite subiicere libuit, vt studiosi vtramque conferant.

DE PIPERE.

PIPER aliud domesticum, cuius vsus est; aliud silue- Piperis duo genera.
stre, quod ob amarorem negligitur.

C DOME-

Domestici
historia.

DOMESTICI planta sarmētoſa eſt, ſcanditq; hede-
ra modo, arboribus quas nanciſci poteſt ſeſe circumuoluen-
do: nodis per interualla prädita; ad quos folia naſcūtur Be-
tele foliis ſimilia, parte interiore ſaturè virentia, exteriore
dilutiora, cuſpide mucronata, & guſtu linguam vellicante.
Horum foliorum alia aliis nigriora ſunt: quæ dilutiora ſunt
fibrasque æqualiter naſcentes habent, feminas cenſent (nam
vtrumque ſexum in foliis eiſdem plantæ conſtituunt) ni-
griora verò, inæqualibus fibris, mares. Ad ſingula interno-
dia, vnde folia dependent, ex ipſa foliorum ſede naſcuntur
vuae, quarum maximè circiter quinquaginta grana obti-
nent, minores verò triginta. Radix puſilla eſt, & ſumma
tellure fibras agit.

Nigrum &
album.

Nigri folio-
rum vtilitas.

Eius ſerendi
ratio.

Avellanæ
Indicæ hi-
ſtoria.

SUMMA autem ſimilitudo eſt plantarum quæ ni-
grum piper proferunt & album: albi tamen folia tenuiora
& molliora videntur: eius etiam fructus magis aromaticus,
meliorisq; ſaporis quàm nigri. Huius verò foliorū nullus eſt
uſus apud eius regionis incolæ: ſed nigri piperis folia dum-
taxat expetūtur in coli doloribus, aliſq; omnibus alui agri-
tudinibus è frigida cauſa prouenientibus: ea oleo Cecci ſive
Nucis Indicæ prius inuncta, deinde calefacta ſupra aluum
adhibentur magno effectu.

PORRO ſeritur Piperis planta hoc modo: ſarmen-
tum eius ſeu ramus iuxta prægrandem qualemcumque ar-
borem aut palum defoditur, atque bubulum ſtercus & ci-
neres cum aqua inſperguntur: infra annum deinde fructi-
fera eſt, quòque vetuſtior eſt plāta, eò ſeracior, quippe quæ
ad ipſius arboris, cui maritata eſt, ſaſtigium ſeſe circum-
uoluenſ ſcandere ſoleat.

DE AVELLANA INDICA.

ADMODVM procera eſt hæc arbor rectaque, tenuis,
rotunda, & fungoſa materia: folia habet lōgiora latioraq;
quàm

quàm Palma quæ Cocos seu Indicas nuces fert, ex summa arbore nascentia, inter quæ prodeunt tenues virgæ paruis floribus onustæ, albis & ferè inodoris, quæ deinde in fructum Areca nuncupatum efformantur, nucis iuglandis magnitudine, minimè tamen rotundum, sed oblongum oui gallinæi exigui modo, exteriori cortice admodum virēte, dum recens est, & vbi maturuit, admodum flauo, vt longè spectantibus veluti daëtyli siue palmulæ mature appareant: materia molli & tomentosa constat hic cortex, continetq; inclusum fructum castaneæ grandioris magnitudine, altera parte similiter sessilem, candidum, durum, rubris venis plenum, quem incolæ edunt.

Areca.

EVM adhuc virentē sub arena condere solent, vt melior graviorq; esui fiat: vulgo autē edunt cum foliis Betele: confringunt etiam, soliquē exponūt & siccant, (tum Checani appellant) eoque plurimum vtuntur tum in cibo, tum in lotionibus adstringētibus: & cortice, seu inuolucro dentes repurgant.

Eius conseruandi ratio & vsus.

Checani.

CV M verò adeò fungosa huius arboris sit materia, frangitur difficulter: idcirco virga duorum digitorum crassitudine ex hac arbore parata Crocodilum cum in aqua, tum in terra facile retinere potest, si per eius fauces transmittatur (ea etenim ratione illos venari solēt) vt sæpe cōspexi.

Fractu difficilis.

Virgæ ex hac arbore paratur ad Crocodilos venandos.

DE PALMA INDICA.

PRÆALTA est hæc arbor, & recta, nec admodum crassa, præsertim in fastigio: nam ab infimo ad summum paulatim gracilescit, & colore cinereo est: truncum à radicibus ad fastigiū vsque paruis quasi gradibus circumdant, qui ascēsuris scalarum vicem præbeant: flos castaneæ similis: fructus verò integer capite humano maior, forma oblongiore, triangulari, & colore viridi admodum diluto.

Palmæ Indicæ historia.

TAMETSI Narel huius arboris nucem vulgo appellant

Narel.

Varia no-
menclatura.

pellent cum Persæ tum Arabes, negant tamen Persæ legiti-
mum esse nomen sed Nargel dicendum: ipsam arborem
Darach Persæ vocāt, Arabes Siger Indi; Turci autem ar-
borem Agāch, fructum Cox Indi: Brachmenes arborem
nuncupant Maro, nucem Naralu.

Insula de
Nalediua.

Huius arbo-
ris vsus.

Ola.

Harum pal-
marum duo
genera, &
eorum vsus.

Sura.
Orraca.

Suræ colli-
gendæ ratio.

Caloins.

Fula.

Ex hac arbore ex insulis de Nalediua fabricantur na-
ues, atque ctavis, malis, velis, rudentibus alijsq; armamen-
tis necessariis instruuntur: instructa iam, mercibus ex eadem
arbore conflatis onerantur, oleo, vino, aceto, saccharo nigro,
fructibus aqua, & ardente aqua vulgo vocata. Ex eadem
arbore extruuntur ædes cum suis tabulatis satis firmæ: atque
eiusdem ramis, (quos Ola dicunt) contegunt imbricum vi-
ce; nam imbres cōmodè arcent. Ex iisdem ramis tecta com-
parant ad tegendas hieme naues, quæ in portum deductæ,
remulco deinde in terram trabuntur.

ISTARVM porro Palmarū duo genera constituunt:
Vnum etenim Suræ cogendæ gratia deligunt, ea est veluti
vinum mustum, quæ ignibus decocta in liquore transit vino
similem, incolis Orraca appellatum; Alterum fructuum ge-
rendorum causa adseruant.

COLLIGITVR verò Sura in hunc modum: Ali-
quem è ramis cerebro viciniorem præcidūt, duorum pedum
longitudinem relinquētes, ad quem vascula ampla, oris ta-
men angustī, illis Caloins nuncupata, colligant: per hunc
ramum præcisum exstillat arbor Suram iam memoratam,
qua organis distillatoris imposita, ignis vi aquam eliciunt
ardentem; purior, illis Fula dicta, hoc est, flos, facilius igne
incenditur quàm nostra aqua ardēs, siue vinum adustum:
altera Orraca nuncupata non item: sed huic purioris ali-
quantulum admiscere solēt. E Sura antequam ignibus de-
coquatur, soli exposita, sit acetiū satis interdum acre, tam-
etsi neque mentha, neque cortex arboris Myrobalani in-
iiciantur, quæ medicamenta plerumq; admisceri solent ut
acetum

acetum acrius reddant. Exempto primo vase Suræ, exstillat alia, quæ ignis vel solis caloribus inspissata, Saccharū sit incolis Iagra appellatum: præstantior censetur, quæ in Naledina colligitur, quàm quæ in Malabar.

FRUCTVS recēs sub primo illo crasso viridique operimento, alio cortice nigro præditus est, medullam tegente, qui recens antequam nigrum colorem contrahat, tener & candicans est, editurq; cum sale, vel sine sale, vel cum aceto & pipere interdum, atque gustu est Cinaræ: cū verò iam nonnihil indurare cœpit, Cardui caput sapit. Medulla cortici adherens tenera & dulcis est, continetq; multam aquam limpidam, suauem, nec fastidium aut nauseam suā dulcedine parientem quæ vulgo in solis ardoribus bibitur. Frequens est huius aquæ sub dio refrigeratæ, atque etiam Iagræ vsus aduersus iecoris renumq; nimios calores, purulentaq; materiæ per virgā excretionem: refrigeratur verò hæc aqua in sua nuce viridi Laña appellata: diu cōseruatur, nam toto anno inueniuntur istæ nuces virides, quarum nonnullæ interdū tres aut quatuor libras siue pintas aquæ continent.

POSTQVAM iā indurata est hæc nux, durioresq; medullam contraxit, remanet in concavitate limpida quidam aqua, at non adeò dulcis vt prior: nucem tum vocant Malabares Eleui. In annotinis nucibus mutatur hæc aqua in rotundam quandam substantiam mali instar, cādīdam, spongiosam, & leuem, sapore dulci.

MEDVLLA nucis recentis tenera alba & dulcis, sola editur ab incolis aut cū Iagre, hoc est, Saccharo è Sura confecto, vel cum Aucla, pulmento ex Oriza in aqua cocta, deinde trita & probè sole exsiccata: editur item cum piscis quodam genere siccato ex insulis de Naledina aduecto, simili fere bubulis carnibus fumo induratis, Comalamasa appellant, bonumq; condimentum est ad bibendi appeten-

Quis eius fructus.

Huius aquæ & Iagræ vsus & historia.

Eius nux.

Eleui.

Eius nucis esus & commoditas. Aucla.

Comalamasa.

tiam prouocandam. Ea verò mixtura non modò incolis in usu est, sed ab ipsis etià Lusitanis expetitur. Ex eadem medulla lac conficitur Amygdalino simile, ad edulia paranda vtile.

Copra.

SOLIBVS exsiccata hac medulla vocatur Copra, suavis est, reconditur, illisq; perinde in usu est, atque nostris Europæis castanea sicca.

Huius nucis
usus.

VVLGO creditur, & experientia comprobatum est, frequentiore huius nucis usum, lumbricos generare: cui morbo totius prouinciæ Malabar incolæ admodum obnoxij sunt.

Malabares
lumbricis
obnoxij.

Corticis vti-
litas.

EXTERNO illo primòque cortice siue operimento crasso, foris læui, intus verò tomentoso dum resiccatus est, fiunt rudetes & alij funes nautici, vti in Hispaniis ex sparto. Tomentum illud Malabares Cayro vocant, magni apud eos usus, nam quoniã aqua marina non corrumpitur, stipatur eo omnis generis naues: itaque illis populis usum præbet læne, xyli, stuparum, lini, & sparti.

Cayro.

Xareta.

E secundo nigroque & duro cortice, qui à nostris Coco dicitur, ab incolis verò Xareta, fiunt scutellæ & alia vasa pоторia in tenuiorum usum. Fiunt etià ex eo vstulato carbonēs auri fabris vtilēs, qui in iis prouinciis periti & industrij, nec admodum sumptuosi reperiuntur. Solent enim suum opificium proclamantes compita circuire, secum deferentes vrceolum, malleolum, & duo cæla, cannæq; tubulum palmari longitudine manu tenentes quo focum incendunt. Ii in edes admissi, vasa ex auro & argento conficiunt, pro eorum qui ipsos euocarunt arbitrio.

Huius palmæ
foliorum usus.

FIUNT ex huius Palmæ foliis petasii maiores & minores ad Solis ardores & imbres arcendos idonei: texuntur etiam storeæ, & alia pleraque.

Coccus de
Nalediua.

COCCVS porrò de Nalediua cognominatus adeò commendatur ab ipsis incolis, & à Malabarensibus, non modò à plebe

plebe, sed à Regibus & Principibus viris, vt in omni fere morborum genere ad eum confugiant tanquam ad sacram anchoram. Fiunt in eam gratiam ex illo pocula que auro vel argento excipiuntur, & in nauium trirremiumq³ figuram efformantur, ad aquam bibendam, in quam ex catenula medulle ipsius Cocci fragmentum pendere sinunt: sibi que certo persuadent, illis, qui aquam ex similibus poculis hauriunt, nullum venenum nocere posse, futurosq³ immunes à multis morbis, in quos memini multos incidere, qui ex iis poculis bibere soliti erant. Et licet omnem diligentiam adhibuerim, nunquam tamen obseruare potui, similia pocula aliquē ex morbis curare, ad quos vtilia esse creduntur: potius igitur arbitror tantam laudem obtinuisse à vulgi opinione. Nonnulli ex huiusmodi vasculis bibere soliti, mihi affirmarunt sese experientia didicisse iecur incendi, renes noxam contrahere, & calculum generari: nihilominus tamen magnum est eorum pretium, longēque pluris aestimatur ijs locis vbi inueniuntur, quàm aliis procul inde distitis: nam interdum eiusmodi nuces nude, neque auro aut argento exornate quinquaginta aut amplius aureis nummis aestimantur.

Mirę eiusfa-
cultates vul-
go creditur.

NIGRIOR autem, nitidior, longior, maiorq³ est hic Coccus quàm alię nuces Cocci communis.

Quā differat
à Cocco co-
muni.

DE MYROBALANIS.

MYROBALANORVM quinque sunt genera diuersis arboribus & regionibus nascentia.

Myrobala-
norū quin-
que genera,

CITRINA que à Medicis Aritiqi, à plebe autem Arare nuncupatur, nascuntur arbore mediocris magnitudinis, multis ramis & in ordinem digestis, prædita; foliis Sorbi.

Citrina
Aritiqi.

EMBLICA illis Anuale dicta folia minutim incisa, filici ferè similia, sed paulò crassiora habent.

Emblica
Anuale.]

Indica.
Rezanuale.

INDICORVM, quæ ab incolis Rezanuale appellantur, folia, salicis foliis sunt similia.

Bellerica.
Gotin.

BELLERICA rotunda sunt, incolisque Gotin dicuntur, & folia obtinēt Laurinis similia, minora tamen & tenuiora. Inueniuntur hæc quatuor genera per totam provinciam Malabar, Dabul, Cambaya, & Batecala, ea sunt quæ in Europam deuehuntur, sicca & condita.

Chepula.
Aretca.

CHEPVLORVM, quæ illis Aretca appellantur, arborem non conspexi, sed eius folia Persicæ foliis esse similia referunt, & arborem eiusdem cum aliis esse magnitudinis: sunt verò omnium arbores Pruni magnitudine, sed pluribus ramis magisque in orbem digestis, prædita.

DE TAMARINDIS.

Tamarindorū historia.

Helecho.
Aristora.

Salsa.

SUNT Tamarindi fructus elegātis & aspectu pulchre arboris, Castaneæ aut Ceratiorū arboris magnitudine, multis ramis prædita, & foliis latā vmbra præbētibus, materie solida admodū: folia filicis femina (quæ Hispani Helecho, Cantabri Aristora appellant) foliis persimilia, dilutè virētia, valde elegātia, gustu acido, gratoque, è quibus condimentū fit (Salsam vocant) perinde atque è petroselino: flores candidi, Aureæ mali floribus admodum similes forma exteriorē, & odore: attamē octonis foliis cōstant, quorū quatuor interiora alba sunt & crassiora velut Mali aureæ florum folia, quatuor verò exteriora tenuiora, & binā ex his eleganti nervo radiata: è medio flore quatuor enascuntur stamina corniculorum modo inflexa, candida & tenuia. Fructus admodum similis est Ceratiis * foris virescens initio, deinde per siccitatem cinereus, continens ossicula rotunda Cassie solutivæ modo aut parvis Lupinis similia, dura admodum, & colore nitido terreo, haud quaquam flauo, quemadmodum nonnulli referunt: his non utimur, sed sola pulpa quæ non nihil lenta & viscida est, iucunda tamen aciditate grata, tamen

tametsi nonnulli indigenæ asserant ossicula asbata & in pol-
linem redacta ex oxygala in alui profluviiis vtiliter exhiberi:
facile auellitur hic fructus, & etiam sponte decidit. Folia
sub noctem sese contrahunt, suumque fructum amplecti so-
lent, qui si desit, sua virgulta & ramos complectuntur:
summa verò aurora sese explicare incipiunt grato specta-
culo: hæc trita partibus erysipelate infectis imponunt, atque
etiam circa phlegmonas ad arcendum qui influit humorem:
iisdem cum sale Ormuziano phlegmonas resoluunt, & cum
cineribus ex Cambaya pituitosos & melancholicos tumores.

Foliorum
facultates.

VOCATUR hic fructus in Canarin Chinchæ, ossi-
cula verò Chincharo, in Malabar Puti, & in Guzarate
Ambili: Arabes, Persæ, Turci Tamarindi vocant; ossicula
Abes, arborem Siger Tamarindi.

Varia no-
menclatura

PRÆFERUNTUR qui in locis montanis iisque
Septentrioni obuersis nascuntur: vsu verò compertum est,
huius arboris umbram sub ea dormientibus non minus no-
xiam esse, quàm arboris iuglandis.

Huius arbo-
ris umbra,
noxia.

* Tamarindorum fructus descriptio verior apud Garciam
conspicitur: cuius legitimam effigiem pete ex doctissimis Lo-
belij obseruationibus, vna cum ipsius arboris semine recens
natæ rudimento.

DE CASSIA SOLUTIVA.

MVLTÆ Cassia solutiva nascitur in Cayro, & ple-
risque aliis prouinciis tum Orientalis tum Occiduae Indiae.
Præfertur tamen quæ ex Orientali delata est, quæq; locis
ad Septentrionem magis vergentibus nascitur.

Cassiae solu-
tiuæ natales
& historia.

AMYGDALÆ magnitudinē æquat, foliis mali Persici
similibus est, nonnunquam angustioribus, locis præsertim sic-
cioribus nata, floribus luteolis aut flauis, non ingrati odoris:
quibus deciduis succedunt siliquæ oblongæ, eleganti virore
præditæ dum recentes sunt, & quæ maturitate nigredinem
breui consequuntur.

Candil.

TANTA est eius frequentia in Cambaya, unde præstantissimam aduehunt, ut vnius Candil (quingentarum & viginti duarum librarum pondus hoc est) pretium non æstimetur pluris quam nummo aureo, qui trecentos & sexaginta marauedis (æreos obolos Hispanicos) valent.

IN MONTIBVS verò Cranganor, & per vniuersam prouinciam Malabar (quando eius maximum pretium) singula libræ viginti marauedis redimi possunt, hoc est, paulo pluris quam dimidio regali Castellano, siue Batzio Germanico.

Varia nomenclatura

GENTILES Canarini fructum Hafanguia & Bauafenga, quemadmodum & prouincia Decan incole, & Brachmenes, arborem Bahoo, & Baua vocant: Guzaratenses Gramala: Malabarenses Condaca: Arabes, Persæ, & Turcæ Hiarxamber: asserebat tamen mihi Cogecela peritus medicus Persa illud vocabulum esse merè Persicum, & legitimum Arabicum esse Gasatfalus.

Eius vsus.

FORIS illinitur medulla erysipelate tentatis & inflammationibus. Inualuit vsus tota India exhibendi delicatulis mulieribus & pueris cassiam solutiua adhuc viuentem saccharo conditam, ad vnciam vnā bono successu: sumitur verò dum adhuc recens est & valde tenera, priusquam cortex induretur, maceratur primū in frigida aqua, antequam cum saccharo coquatur. Moderatè & sine molestia aluum subducit.

* Persicæ mali folia quodammodo æmulantur, si singularia separes. Quoniam verò coniugatim bina semper in oblongo neruo nascuntur, & summa ala postremum, imparitatem faciens: commodius meo iudicio comparasset cum fraxini foliis aut similium arborum quæ alata folia ferre solitæ, ea integra abiicere consueuerunt, quemadmodum Iuglans, Sorbus, Rhus, Ceratia, &c.

Huius arboris ramulo cum suis floribus & foliis Cuci, & Cedri fructu, aliisq. varij generis seminibus ante biennium donati

donatissimus à doctissimo diligentissimoq. viro D. Bernardo Paludano, qui ea ex Syriaca, Arabica, Aegyptiacaque sua peregrinatione retulerat.

DE ANACARDIO.

MAGNA est Anacardij copia in Malabar, & reliquis Anacardij historia.
Indiae provinciis. Fabæ vulgari admodum similis, dum adhuc viret & recens est; exsiccatus verò niger & splendens: continet medullam Amygdalæ similem, inter quam & supremum corticem oleum admodum vrens inuenitur.

DOCTOR Orta scribit eum fructum in vsum medicum recipi, & in illis regionibus in lacte maceratum dari Eius fructus utilitas.
asthmaticis, & aduersus lumbricos: eum præterea viridem sale condiri, & edi oliuarum conditarum in morè: Ait etiam eo siccato caustici vice in strumis vti indigenas, totaque India eius cum calce mixti vsum esse ad obsignandos pannos.

EGO sanè vidi hunc fructum viridem, & per multos dies sale & aqua conditum, Oliuarum Hispanicarum modo, venalem in foro proponi, & edi non solum quidem, sed excitandæ appetentiæ causa coctæ orizæ admisceri, vti Mangas.
solent fructum Mangas vocatum, aliosque fructus adstringentes & acidos, alias minimè.

NONNULLI in desiccato extimum corticem demunt, eamque membranam qua medulla tegitur, deinde medullam edunt ad bibendi appetitum irritandum. Ego verò & virentem conditum, & siccati medullam degustavi: sed neutro modo mihi delicatus videtur. Illud porro certissimū, oleum id quod inter corticem & nucleum continetur Oleum inde confectum.
admodum causticum esse & venenosum.

TOTA tamen provincia Malabar, eius vsus est caustici vice. Si quis instillet in putridum & cauum dentem, Cuius sit vsus.
ipsum vrit frangitque, & corrumpit facile. Calce addita
ad bon-

ad bombycinos pannos obsignandos, & alias res quaslibet notandas vtuntur: etenim notam adeò firmiter imprimunt, vt nulla lotionem eximi queat.

Aliz huius
fructus fa-
cultates.

SOLENT interdum Indi nonnulli hunc fructum cuspidi cultelli infixum candele ardenti imponere, qui, dum vritur, mirum quos strepitus edat, quas ignis scintillas quasi fulmina eiiciat diuersorum colorum, eaque ratione rudioribus quibusdam & mulierculis imponunt, illis persuadentes, se in ijs scintillis & flammæ radiis spiritus conspiciere qui ipsis loquantur, & eos edoceant quodcumque scire cupiant. Tali igitur commento miseros fallunt, persuadentque quod volunt, dantes responsa ijs qui ipsos consulunt, pro suo arbitrio. Vt verò omnes isti gentiles, augures, incantores, & diuinatores raro loquuntur, & cum mora ponderèque respondent; in suis responsis semper sunt ambigui, & adeò astuti, vt quomodocumque res, de qua cōsulti sunt, cadat, suam estimationem minimè periclitentur, dicantque se euentum prædixisse.

DE CAIVS.

Cajus histo-
ria.

MALVM Punicam magnitudine æquat hæc arbor; folium eius dilutius viret, & carnosum est: flos candidus, similis ferè mali aureæ flori, sed pluribus foliis constans, nec adeò odoratus. Præbet hæc arbor fructum Caju vulgò appellatum, qui quoniam boni saporis est & ventriculo utilis, ab omnibus multum æstimatur.

Eius fructus
descriptio.

EST autem hic fructus, magni mali instar, valde flavus & odoratus, intus spongiosus & succi plenus sine vllis granis, gustu subdulci, nonnihil tamen fauces coarctante. Sed duplicem habet eodè anno ortum hac ratione: marcescente flore subsequitur faba * prægrandis, inter quam & florem intumescit quiddam malo simile, quod paulatim fabæ succum ad se pertrahit: quòque maius incrementum sumit, eò faba
sua

sive nux magis minuitur, donec fructus Caju, hoc est, malum illud, plenam consequutus sit maturitatem, quod è colore flauo aut rufo (nam vterque color in his malis conspicitur) & odore deprehenditur: maturo fructui inhaeret nihilominus faba illa, & cum ipso colligitur.

BELLARIORVM vicem præbet hic fructus ex Et utilitas. vino sumptus, aut sine vino: nam præter saporis gratiam, utilis admodum compertus est in ventriculi debilitate, vomitibus, & appetentiæ deiectione. Quiverò his auxiliis non egent, prius in aqua nonnihil maceratum edunt.

NON vbique nascitur hic fructus, sed in hortis vrbis S. Et natales. Crucis Regni Cochin inuenitur.

* Mirari satis nequeo nostrum Auctorem huius nucis, quæ in extremo fructu nascitur, vel è qua, vt ipse refert, ipsum malum incrementum sumit & substantiam haurit, formam, colorem, consistentiam, & oleum in cortice conclusum (non secus ac in Anacardio) non describere; cum apud Brasilianos, quibus *Caius* sive *Caious* (ita enim pronūciandum) dicitur, non minore fortè in vsu sit, quàm ipsum malum, vt ego de iis qui in Fernambuco diu vixerunt intellexi, & in annotationibus ad caput de Anacardio historia Aromatum, adscripsi, ad quas lectorem remitto. Arbitror autem hunc fructum in regnū Cochin recens fuisse illatū, & propterea plenum eius vlem nondum innotuisse. Certè quotquot hactenus de stirpibus Indiæ Orientalis scripserunt, nusquam eius meminerunt, nec ipse quidem D. GARCIAS AB ORTA, qui paucos ante annos Aromatum historiam conscripsit.

DE SPICA NARDI.

DE PISO veneno quod Lacuna commentariis in 6 cap. lib. 1. Dioscorid. scribit ex Nardo Indica fieri, nec D. Orta vnquam summa diligentia exquirens, nec ego, tametsi plurimos de eo percontatus sim, in India intelligere potuimus.

PRÆSENTISSIMVM quod apud eos est venenū, vocatur Bicho de Ormuz, id est, Lacertus ex Ormuz, Venenū Lacerti ex Ormuz. qui

qui similis Scinco est, de quo & eius exitiosissimo veneno, & diabolica arte qua homines extinguere solent, referemus in libro Animalium. Secundum locum obtinet Manga siluestris, de qua inferius. Tertium quod è Tigridis pilis fit: Deinde quod è planta quadam lacteo succo plena, cuius magna nascitur quantitas in prouincia Malabar. Sed & Napellus locum suum obtinet.

DE RHABARBARO.

Rhabarbari
natales.

Canta vrbs,
portus &
emporium.

R H A B A R B A R V M singulare medicamentum, dignumq; veneratione apud omne humanum genus, in interiore Chinarum regione dumtaxat prouenit, vnde in urbem Cantan (nobilissimum totius illius prouinciae portum & emporiū, vbi Lusitani habitant,) exportatur, & inde nauibus in Indiam aduehitur. Alia item via ex eadem interiore prouincia Chinarum camelis deferunt per Tartariam & Vzbeque in Ormuz, & inde in Persiam, Arabiā & Alexandriam, vnde postea vniuersa Europæ communicatur. Id non est adeò cariosum, & praefertur illi quod nauibus in Indiam importatur, ed quòd magna ex parte corruptum est, facile enim in ista per mare vectiōe vitatur.

HÆC sunt quæ de Rhabarbari natalibus cōperta sunt, nec D. Orta cum insigni sua diligentia, nec ego plura consequi potuimus.

De Rhabar-
bari præpa-
rati ratione
quorundam
error.

Q V O D verò nonnulli scribunt, eius regionis incolæ Rhabarbarum macerare, deinde succum exprimere, è quo ad solem depurato, trochiscos parare soleāt, Principibus viris purgandis idoneos, nobisq; deinde radices exsuccas, & inutiles mittere, fabula est, quam inde originem sumpsisse arbitror, quòd nōnulli gentiles mercatores Rhabarbaro fungosiori & vetustiori (vt facilius à corruptione liberent, nè uetredo quæ id erodere solet, innascatur) aquā nō feruentem, sed tepidam adfundāt, deinde lineis pannis emundatum bacillis

cillis aut filo traiciant, & exsiccent, & nonnulla foramina piperis tenuissimè triti polline & cera obturent: deinde probè siccatum in Psyllij semine adseruent.

HÆC mihi retulit mercator Canarinus vir probus, sanctèque affirmabat ea dumtaxat fieri ad præseruandum à corruptione Rhabarbarum, addebatq; id rhabarbarum in quo conspiceretur foramen, quo traicctū pependisset, ea ratione præparatum fuisse, neque ideò improbari, neque affusam aquam multum de ipsius viribus detraxisse.

DE RADICE CHINÆ.

VOCATUR hoc excellens medicamētum in China- Radicis Chi-
næ nomen-
clatura varia
rum regione Lampatan, in Decan Lampaos, in Canarin Bonti, ab Arabibus, Persis & Turcis Chophchina.

NASCITVR abundantissimè in Chinarum regio- Eius natales.
ne: inuenitur tamen etiam in Malabar, Cochīn, Crāganor, Coulan, Tanor, & aliis locis.

PLANTA est multis tenuibus spinosisque sarmentis Eius descri-
ptio.
prædita, smilaci asperæ non absimilibus, quorum maxima minimum manus digitum crassitie nō superant, foliis plantaginis latifolia magnitudine: radices pugnū nonnunquam æquant, interdum minores sunt, solidæ, graues, candidæ, interdum etiam rubescentes, & multæ sæpenumero simul coherentes.

PLVRIMVS est huius radici vsus in omnibus Orien- Facultates.
talis Indiæ prouinciis ad varios morbos: quin adeò innoxia censetur, vt eam sumentibus, tametsi nullā victus rationem obseruent, sed liberè carnibus & piscibus vescantur, nihil incommodi adferre credatur. Vulgaris tamen quæ in Chinā Indiæ prouinciis obseruatur, sumēdi huius radici decocti cōsuetudo est, vt radici vncia vna, additis radicū Apij duabus drachmis decoquatur lento igne & sine fumo; in decem & sex aquæ libris ad sex librarū cōsumptionem reliquos de-
cem

cem in fictili vitriato adseruant, sumuntq³ singulis diebus recens decoctum, quoniam facile corrumpitur, nec ultra diem adseruari potest. Eius verò tepidi manè sumit ager plenū haustū, duabusq³ horis in lecto remanet, postea surgit, duabus autem horis ante cœnam totidem haurit, interdiu de eodem frigido bibit.

PLERIQUE tamen etiā dum sua negotia exercent & nauigant singulis diebus manè & vesperi duas eius radicis in puluerē redactæ drachmas ex vino, aut ipsius radicis decocto felici successu bibere solent.

ORGANIS etiam ex hac radice recenti, aqua elicitur, delicatioribus admodum familiaris: attamen & ab aliis magna quantitas absumitur, quoniam illi plurimum fidunt non modò in morbis à D. Orta enumeratis, sed etiam in hemicrania, in herniis humoralibus, & ventosis, in colli vesicæ & penis callis, eorumq³ vlceribus, venerē etiam admodum excitare creditur: decoctum tamen ipsa stillaticia aqua præstantius est. Optimè conseruatur radix, si pipere confractò inuoluatur.

DE CROCO INDICO.

Croci Indici
historia.

MAIORA latioraque habet Crocum Indicum folia quàm Orchis Serapias dicta, colore foliorum Scillæ, dilutiora tamen & tenuiora; caulem habet è foliis simul implicatis, & sese mutuo amplexantibus constantem: radicem foris Zingiberi similem, intus croceam.

Curcum.
Saroeth.

PRÆTER nomina ab Orta enumerata, apud Arabes etiam Curcum dicitur, apud Turcos Saroth.

DE GALANGA.

Duplex Ga-
langa.

DUPLEX est Galāga medicamentum vsibus humanis valde necessarium, dignum q³ vt Pharmacopola in officinis perpetuò habeant.

VNA minor & odorata, quæ cū Rhabarbaro ex Chinæ regione in Indiā aduehitur, & inde in Lusitaniam defertur, incolis Lauandou dicta.

Lauandou.

ALTERA maior, plurima nascens in Iaua & Malabar, cuius descriptionem, quod maiore sit in vsu, hic damus. Ea duorum cubitorum altitudine crescit, nonnūquam amplior, fecundiore præsertim solo: folia habet Orchidi Dioscor. lib. 3. descriptæ similia, longiora tamen & latiora, superne saturatius inferne dilutius virentia: caulem ex foliorum inuolucris constantem, uti in Orchidum generibus: florem candidum, inodorum: semen exiguum, neglectum: radicem secundū caput crassam & bulbosam, reliqua ex parte Zingiberi similem, sed maiorem, nonnunquam capitula, hastula regie modo, proferentem.

SERITVR radice quæ mirum in modū sese propagat.

APPELLATVR à Canarinis & Brachmenis (quibus maximo est in vsu cū in hominum tum iumentorum morbis, quique eam ordinariē cum Oriza, vel piscibus, vel in acetariis edunt) Caccharu, ab Arabibus Caluegian, in Iaua Lancuax, in Malabar Cua.

Nomina
varia.

ADEO autem vulgaris est apud Malabarēses huius radicis vsus, ut non modò in medendis morbis eam vsurpent, sed in farinā etiam conuertant, ex qua Cocci seu nucis Indicæ lacte, nonnunquam Sura, aut Iagra excepta, certum quoddam panis genus pinsunt in tenuium placentularum formam, Apas vocant: in deliciis est hic panis, præbētq; iis qui ventriculi debilitate, & frigidityte laborant, in alui doloribus, vteri affectibus & vrinæ difficultatibus: quo postremo in morbo miram eius efficaciam experiuntur, siue ob humores crassos & pituitosos, flatūsue aut arenulas in vreticulis aut collo vesicæ congestas, vrinæ difficultas orta sit, vel etiam ex carnis excrescentia in ipso vesicæ collo aut meatibus nata. Præbent verò edendum hunc panem, deinde hau-

Eius vsus &
facultates.

D

stums

Nimpa.

stum Nimpa (qua veluti aqua ardens est) concedunt; in inguinibus verò supràque pubem & collum vesicæ, folia Nymphae decocta in aqua & macerata atque adhuc calentia applicant.

* Neque hic auctor, neque Garcias ab Orta mihi satisfaciunt in Galangæ maioris descriptione, præsertim si ea, qua Europæ officinæ vtuntur, legitima est Galanga maior: etenim eius radices multo maiorem similitudinē habent cum Iridis, quàm cum Asphodeli aut Zingiberis radicibus. Et certè omnino mihi persuadeo Galangam nostrā maiorem Iridis genus esse huic fortè simile quod in mea Pannonicarum stirpium historia primum est. Nihil tamen statuo.

DE ZINGIBERE.

Zinziberis
descriptio.

TRIVM aut quatuor palmorum magnitudine assurgit, foliisque est Milio maiori, quod Lachryma Iob vulgò nuncupatur, admodum similibus; caule verò Asphodelini crassitie, ex multis foliorum involucris constans, vt veluti exigua quedam arundo appareat: radicibus quodammodo Iridi similibus.

DE LIGNO COLVBRINO.

Dux ligni
colubrini
stirpes.

BINÆ stirpes in Malabar inveniuntur plurimum dissimiles cum forma, tum nascendi modo, vno tamē eodemque nomine nuncupatæ, Lignum Colubrinum, quod singula mirum in modum viles sint aduersus colubrorum morsus.

Prioris historia.

PRIOR nascitur hedera modo, colore Dracunculii maioris, siue Serpentaria: folia illi sunt Bryonia ferè similia, integra tamen initio, neruoque prædita per longitudinem excurrente, & quinque aut sex venis in latera vergentibus, successu temporis accedunt exigua foramina, qua paulatim cum foliis incrementum sumunt donec tandem omnino folia scindant, eaque vitis foliis similia reddant: conspiciuntur enim interdum in eadem stirpe folia integra, alia exiguis,
nonnulla

nonnulla maioribus foraminibus prædita, omniâque adeò inter se dissimilia, vt minimè eiusdem plantæ folia esse videantur. Tantam verò habet hoc lignum cum colubro similitudinem, vt qui non norit, aut de die viderit, si ad Lunæ splendorem noctu cõspiciat, viuum colubrum esse existimet.

VVLGO censetur præstantissimum remedium aduersus colubrorum & viperarum morsus: incolæ sanè, dum in agros tendunt, magna ex parte circumferre solent hoc lignum (sunt enim in ea prouincia multæ vipera, variâque serpentum genera) aiuntque solo eius odore serpentes fugari: & si dum colubros venantur, eos attingere hoc ligno queant, ilicò rumpi & extingui.

ALTERA admodum brevis est & tenuis, triâque solummodò folia habet mollia, leuia, saturatius virentia: florem aut fructum non conspexi, nec quenquam inueni qui se vidisse assereret: radix oblonga & tenuis est, minimo digito minor, hinc inde nonnunquam extuberans, & summatellare serpens: exterior eius cortex valde tenuis est & cinereus, nullo, dum gustatur, manifestò sapore præditus, deinde tamen gustum in ore relinquens suauem, & vti Moses odoratum: fissus est vndique hic cortex, & sponte sese expedit ab alio crassiore flauoque cortice subtus nascente, qui odorem Loti siluestris siue trifolij odorati vulgaris refert, & saporem Glycyrrhiza dulciorem: præmansus autem odore admodum suauis, nec iniucunda mordicatione, momentanea tamen præditus esse deprehenditur: ipsa materies lignosa est, candida, dura & insipida: folia napi saporem referunt: germen producit hæc radix supra terram circiter quatuor vncias longum, in caput extuberans.

NOMEN huius plantæ apud Canarinos est Duda Sali. Nomenclatura.

TRITA radix cum aqua rosacea aut vulgari, vel cum vino (indifferenter enim vtuntur) præsens certumque asse-

runt remedium aduersus omnis generis serpentum morsus. Plurimus etiam eius est vsus in febribus continuis, tertianisque, syncope, ventriculi debilitate, & cordis tremore: datúrque aduersus omnis generis venena. Multi mihi sanctè affirmarunt dummodo manu hanc radicem tenerent, nullos serpentes, vel alia similia virulenta insecta formidare; & certissimum esse serpentes & viperas eius aspectum minimè ferre posse, sed fugere, celerrimèque in aliam partem sese proripere, si quis ante serpentes eam proiiceret.

PERVTILIS etiam censetur iis quibus anhelitus ab ore vitiato aut dentibus corruptis foetet, modò eam continuo mandant, dentiúmque cauis gestent.


Eius natales.

PROVENIT locis humidis, & inter arbores, praesertim verò secundum eas quæ Angelinis nuncupantur, nec procul à mari.

Colubrini
ligni genus
tertium.

INVENITVR & tertium Colubrini ligni genus in eadem prouincia, vastæ arboris magnitudine, de quo in alio libro agemus.

* Neutrum horum ligni colubrini generum cum GARCIAE ligno colubrino conuenire faciliè animaduertet, qui vtriusq. descriptiones diligèter conferet. Secundi verò generis GARCIAE descripti fragmentum quinque vnciarum longitudinis, quodque, vt conicere licebat, duarum vnciarum crassitudinem æquarat, mihi non modò ostendit Londini anno 1581. C. V. D. Hector Nuncz Medicus Lusitanus, sed etiam dimidia eius parte liberaliter donauit. Eius porro materies firma est, candida, venis quibusdam distincta, non dissimilis fraxini ligno, cortex autem qui eam integit cædicans, & quasi cinereus. Vtraque verò, si quis degustet, amaro sapore prædita esse deprehenditur. Eius fragmenti iconem lectoris oculis subiecimus.



DE LIGNO MOLVCENSI.

Ligni Molu-
censis narra-
les & descri-
ptio.

INVENITVR in Moluccis arbor quedam domestica Malicotonæe magnitudine, cuius folia Maluæ vulgaris foliis sunt similia, fructus verò auellanis, sed minor, molliore cortice & nigricante.

SERITVR coliturque in hortis diligenter, nec alibi facile inuenias: tanti enim ab incolis estimatur, vt peregrinos ne ad eius quidem conspectum admittant.

Panaua.

INCOLÆ Panaua appellant. Cum verò istic Regis nomine gubernaret prudētissimus & animosissimus Dominus Ludouicus de Tayde, ipsius nomine hæc arbor dicta fuit, quoniam ille primus nobis eius insignes facultates aperuit. Accidit enim vt nobilis quidā Lusitanus, Henricus de Lima vocatus, dū in Moluccis versaretur, animaduerneret quanta cura & diligentia incolæ hanc arborem colerent, quanti-^q estimarent, atque ideò illius facultates apprimè intelligere cupiens, nonnullas tandem edoctus est. Nactus igitur trunci huius arboris partem, eam obtulit Proregi, bonarū rerum, & naturæ secretorum studiosissimo, tanquam medicamentum valde necessarium, cognitūque dignum, & nostris hominibus hætenus inauditum. Anno autem sexagesimo primo supra millesimum & quingentesimum interrogans me Prorex, an aliquid de hac arbore inaudissem, aliquot eius facultates retuli quas ab aliis didicissem, conquerens arborem nondum licuisse videre: tum ille eius quod habebat fragmento me donauit, imperans vt cum iudicio & ratione experirer, nec vllius vitam periclitarer, deinde rerum successum illi significarem: quod me facturum recepi. Eius itaque ligni periculum feci, cum in nonnullis egris quorum curam habebā in nosocomiis, tum in variis morbis qui in longa nauigatione plerumque oriri solent dum in Lusitaniam redirem; partim adiutus facultatū relationibus quas intellexeram,

lexeram, & vtendi methodo, partim iis quæ Nobilis ille in Moluccis didicerat.

ILLIVS semen iam antè videram mihi donatum ad Eius semen in aucupis vile.
 aues capiendum: etenim eo in aucupis vtuntur non modò in illa regione, sed etiam in multis Indiæ prouinciis, ad quas, eius rei gratia, venale defertur. Eius pauxillum cum oriza cocta mixtum auib; siluestribus exponunt: quæ degustant, ilicò decidunt sopitæ & stupidæ; quæ verò auidius id edunt, moriuntur antequam illis auxilium præberi possit, quod est, vt frigida caput persundatur. Graculi omnium citissimè eo degustato extinguuntur.

NUNC ad salubrem huius arboris materiem accedamus, cuius pauxillum hodie plurimi facio.

INTVS sumptum, aut foris appositum, omnibus Aduersus venena prodest.
 venenis resistit.

INTRO assumitur magno commodo ex aqua rosacea vel vulgari, auiumque iusculo eius pulueris apta quantitas pro necessitate, & ægri natura, modò decem grana non excedat, sed infra id pondus consistat. Ad viperarum, Regulorum (qui serpentes pileati appellatur, & admodum noxijs sunt) aliorumque similium aspidum aut serpentum morsus, bibitur hic puluis ex aqua, ipsiq; morsibus puluis inspergitur. Eadem ratione præbent in vulneribus quæ à sagittis toxico illitis facta sunt, quibus illius regionis incolæ plurimum vtuntur.

PVLEREM verò ex hoc ligno sibi parant lima è Eius pulueris vsus.
 pelle marinæ canicula cōfecta, aut tenui aliqua ferrea lima.

ROBUSTISSIMO cuique dimidijs eius scrupulus ex aqua limpida tepida aut rosacea, aut gallinarum iusculo tepente, summo manè datur (cœna autem diei præcedentis parca esse debet) euacuat enim omnes humores, præsertim crassos, lentos, & melancholicos: cōuenit quartanis, diuturnis, febribus continujs, iliacis, colicisq; doloribus, flatibus, hydropis,

Canja.

Eius præsta-
tia.

dropisi, arenulis, renum calculis, vrinae difficultatibus, sauis-
sima colerica passioni, alijsq; morbis, veluti articulorum &
tiliarum inueteratis doloribus, scyrrhis & scrofulis. Om-
nis generis lumbricos necat, & appetentiam deiectam reuo-
cat: & si nimia fiat euacuatio, bibat aeger dimidiū cyathum
Canja, hoc est, decocti orizæ, aut auiculam comedat, subito
cessabit, quod sanè multa laude dignum est, paucisq; medi-
camentis vulgare, vt in potestate sit medici aut aegri, pur-
gari quantum cupierit. Huc accedit quòd neque fœtorem,
neque tadium, neque metum dum sumitur pariat, possitque
sine diete obseruatione, etiam iis qui sua negotia foris pera-
gunt, propinari, vti ex iis deprehendi qui vna mecum eadem
naui vehebantur, nullū sentientes incōmodum, tametsi dum
purgarentur nulla dieta vterentur, viuerentq; solutissimè.

OBSERVAVI etiam illius præstantiam in inuete-
ratis capitis doloribus, hemicrania, apoplexia, aurium timi-
tu, arthritide, ventriculi & vteri affectibus & asthmate.
Propterea fidens illi plurimum, sæpius in diuersis naturis,
etatibus & locis, feliciter vsus sum, & sine vlla molestia, nisi
quod in biliosis naturis, calidisq; vetriculis nōnihil molestia
pareret donec cibum sumerent, & in nonnullis vomitum
excitaret: sed biliosis hunc puluerem nonnunquam dedi sy-
rupō acetoso aut carambola condita exceptum: aut in cata-
potia cum saccharo rosato efformatum.

EXHIBENDVS est summo manè, neque cibis aut
potus concedendus donec purgati sint quantum necessarium
videtur, tum demum cyathus iusculi gallinarum tepidi da-
tur, dimidiaq; aut integrā hora post, conceditur pullus gal-
linaceus, & paululum vini aqua bene diluti, deinde toto illo
die potu abstinet ad cœnam vsque, quæ parca erit, & facilis
concoctionis. Subsequenti die sumitur saccharum rosatum
cum aqua buglossi, aut borraginis, aut cōmuni, atque imi-
citur clyster ad aluum eluendam.

SOLET

SOLET verò interdum in nonnullis ani pruritus & excoiationem excitare, atque in aliquibus (sed paucis admodum) hemorrhoides.

HÆC sunt quæ de hoc ligno Panaua conspexi & intellexi: Nunc verò in illis regionibus magnus est eius vsus, tantaq; æstimatio, vt sine metu in multis morbis supra enumeratis vsurpent. Ego bis illud sumpsi in coli dolore & hæmicrania, mihiq; salutare esse deprehendi.

CETERVM cum propter eius insignes facultates incolæ plurimi faciant, easq; quantum in ipsis est, celare nos studeant, quæ proculdubio longè plures sunt quàm quas nominamus, sperandum est temporis (quod omnia reuelat) successu reliquarum quæ nobis adhuc ignotæ sunt, notitiâ nos consequuturos: easq; in libro quem præ manibus habemus fidele liter enarrabimus, si, antè quàm in lucem prodeat, intellexerimus.

DE MORINGA.

LENTISCI magnitudine est Moringa, cui persimilia habet folia: paucis prædita est ramis, eamque ob causam exiguam præbet umbram, multis nodis scatet, adeoq; fragilis est, vt facillimè cum ipse frutex, tum rami confringantur: folia saturatius virent, viuidiq; sunt coloris; saporis vero foliorum napi: fructum fert pedalem, raphani crassitie, octo angulis insignitum, colore dilutiore inter viridem & cinereum, intus cæcidum, medullosum, & in certa receptacula distinctum, quibus continenter rotunda semina Eruo similia virentia & admodum tenera, sed sapore quàm folia acriore. Editur hic fructus cū carnibus coctus, aut alio modo paratus.

Moringæ historia.

HUIUS arboris radix Unicornu, & lapidis Bezar vices supplet, veraq; theriaca est qua vulgo incolæ vtuntur cum aduersus omnis generis venena, tum morsus serpētium

Eius vsus & facultates.

D S maximè

maximè noxiorum, vulgò Culebras de Capillo dictorum, aliorumq; insectorū, & virulentorū animalium, cū intro sumpta, tum foris applicata. In colerica quam vocāt passione singularis efficacie esse deprehendi. Miscetur remediū melancholicos humores purgantibus: & probè nota est Elephantiasī laborantibus, quorum plurimos, eius continuo vsu sanari perhibent.

Eius natales.

ABVNDE nascitur variis India locis, sed præsertim tota prouincia Malabar, secundum flumen Mangate, vbi admodum luxuriat, multosq; fructus profert, qui vulgò in foro venduntur perinde atque faba in Hispania.

Nomenclatura varia.

ARABES & Turcæ Morian appellant: Persæ Tamer Guzaratenses Turiaa.

DE LAPIDE BEZAR.

TAMETSI in altero libro, (quem De quadrupedibus, serpentibus, & auibus quæ in India inueniuntur, scribere speramus) de omnibus gemmis lapidibúsque qui in medicum vsū veniunt, simus acturi: placuit tamen hoc libro lapis Bezar mentionem facere, quem, quotquot de eo scripserunt, aut eo vsi sunt, & adhuc vtuntur, vno ore asserunt maximum præstantissimūque esse antidotum aduersus omnia venena, nō modò intro assumptum, sed etiam foris adhibitum.

Lapidis Bezar quātitas & forma.

INVENITVR hic lapis varia magnitudinis, formæq; & diuersi coloris: nā sunt qui dūtaxat dimidiā drachmam, sunt etiam qui duodecim & quindecim drachmas pendant, quales ego conspexi; nonnulliq; adhuc maiores reperiri ferunt: sunt præterea rotūdi vti auellanae, alij oblongiores ouī forma, aut columella, alij triangulares, alij sessiles vna parte, & gibbi altera vti castanea: postremò nonnulli sunt coloris ex viridi nigricātis, alij mali insani colorē referunt, alij obscuriores sunt, alij dilutius virēt, & nonnulli etiā flauescūt.

GENE.

GENERATUR iste lapis in ventriculis animalium bircoferè similium, arietis prægrandis magnitudine, colore raso, uti cerui propemodum, agili, & acutissimi auditus, à Persis Pazan appellato, quod variis Indiæ prouinciis, uti in Pazan. promontorio Comorim, & nonnullis Malucca locis, tum etiã in Persia & Corasone, insulisq. quæ à Vacca cognomen adeptæ sunt, inuenitur: similiter in Occidentali India, referente Petro de Osma in epistola quam ad D. Monardis conscripsit.

UT verò differunt figura & colore hi lapides, sic etiam Eius varietas & differentia. nonnihil pondere & substantia variant: etenim eiusdem magnitudinis videas, alios aliis leuiores, alios aliis solidiores pluribusque aut paucioribus tunicis præditos, nonnullos etiam usque ad centrum continuos, aliquos in quorum meditullio puluis quidam reperitur, alios in quibus aliquid herba sicca simile, plurimos in quorum centro paleolam tenuem solummodo inuenias circa quam lapidem efformari quidam putant.

PRÆFERUNTUR autem Orientales, atque omnibus Persici antecellunt. Sunt qui, referentibus nonnullis, huius lapidis puluere vtuntur singulis quindecim diebus, Huius lapidis puluis cuius sit usus. existimantes eo medicamento partes corporis vitales, generationisque membra roborari.

ASSERVUNT iis regionibus in quibus inveniuntur Animalium quæ hunc lapidem generant, venatores aded esse peritos & exercitatos, ut quanam animalia maiores lapides contineant, solo conspectu possint iudicare, aiuntque ea animalia in quorum ventriculis maiores lapides latent, minus mobilia, agiliave esse, & lenta, subtristiaque apparere. Interdum etiam extincta animalia inueniri, in quorum receptaculis lapides grandes sint.

PORRO horum lapidum tanta est æstimatio apud gentiles & indigenas, ut dicere soleant: Licet Deus omnia in homi-

Huius lapidis præstia.

in hominum vtilitatem crearit, damnum tamen quodammodo esse, eum lapidem in alium vsum conuertere, quam Principum & nobili stemmate progenitorum, quandoquidem in plebis vsum lapidis BeZar loco, radicem Moringa crearit, de qua superiore capite.

DE ARBORE TRISTI.

Arboris tristis natales & qualitas.

NONNVLIS Indiae locis, praesertim verò in Malabar, frequentissima nascitur Arbor quaedam magnitudine & forma fere Pruni, multis praedita ramis tenuibus, & certa per spacia nodulo distinctis, è quo vtrinque singularia folia enascuntur Pruni foliorum magnitudine, mollia & lanuginosa parte auersa, quemadmodum fere salviae folia, & viridia nonnihilque aspera parte interiore, non adeo serrata in circuitu, ut pruni folia, neque tam multis venis praedita. E singulorum foliorum sede nascitur pediculus quinque capitula summa sui parte sustinens, quae quatuor foliolis subrotundis constant, è quorum medio quinque flores exiliunt candidi, elegantes, Aureae mali floribus magnitudine & figura pares, tenuiores tamen, elegantiores, & odoratiores, pediculo magis ad rubrum quam ad flauum colorem tendente, quo in illis regionibus edulia tingunt, quemadmodum apud nos vulgo fit croco: fructus magnitudine lupini est, virescens, cordis effigie, per medium secundum longitudinem sectus, continens in vtraque parte quoddam receptaculum in quo semen occluditur, magnitudine seminis Ceratij siue Siliquae, cordis effigiem retinens, album, tenerum, membrana subuidente reatum, nonnihil amarum.

Nomenclatura varia.

VOCATUR haec arbor in Canarin Parizataco; in Malayo Singadi, in Decan Pul, ab Arabibus Guart, à Persis & Turcis Gul.

Odor.

RES est profecto obseruatione dignissima, conspiciere hanc elegantissimam arborem nocte pulcerrimis, suauissimeque
olen-

olentibus floribus onustā & hilarem, & simul atque à Solis radiis illustratur, nō modò flores omnes in terrā abiicere, sed totam arborē cum suis foliis quodāmodo marcidā apparere.

INTER omnes sanè quos vnquam odoratus sum flores nullam meo iudicio meriti cum hoc comparandum, præsertim initio dum quis repente locum ingreditur vbi hæc arbor est consita: nam postquam manu contacti sunt, exiguus & euanius est odor.

INDIGENÆ istos flores correficere cēsent, sed amarissimi sunt: nam recēter ex arborē collectos & in cibis degustavi, & nonnullam amaritudinem semper deprehendi. Gentiles etiam medici eius semen inter medicamenta correficientia recensent.

Florū vires.

MULTI Proreges, tribuni, atque alij priuati hanc arborem in Lusitaniam transferre voluerunt, sed irrito conatu. Noui etiam quosdam qui semen commodo tempore collectum & maturum, vasculis figulinis vitratis atque bene obturatis, item argenteis, pyxidibusq; ligneis in Lusitaniam detulerunt, ibique cū omni cura & diligentia seuerunt, sed nunquam nasci voluit.

IN Malabar autem & Goa, locisq; vicinis cum tanta facilitate nascitur, vt quilibet rami in terram depacti comprehendant.

DE NEGUNDO.

DVÆ arbores multis Indiæ locis, præsertim verò provincia Malabar inueniuntur, in vsu medico aded commendata, vt multis morbis vtiles esse deprehendantur.

Duplex Negundo.

EARVM prior mas censetur, & à Canarinis Varalo Nigūda appellatur, Amygdalæ magnitudine, foliis supernè virētibus, infernè hirsutis, foliorum Saluie modo; & in ambitu serratis, quæ procul aspicientibus Sambuci foliis similia videntur.

Prioris descriptio & nomenclatura.

ALTERA

Alterius hi-
storia & no-
menclatura.

ALTERA Negundo femina nuncupata, aut Norchi-
la à Lusitanis, vulgò in Canarin Nyergüdi dicitur: in Ba-
lagate Sambali; in Malabar Noche: vtraq; verò tam mas-
quàm femina Arabibus, Persis & Decan incolis Bache vo-
catur, Turcis Ayt. Eadem magnitudine qua prior assurgit,
folia verò habet ampliora, rotundioraque, neque in ambitu
serrata, foliis Populi albæ perquam similia.

VTRIUSQUE generis folia Saluiam odore & sa-
pore referunt: degustata tamen magis amara & acria
deprehenduntur: in plurimis foliis parte auersa summo ma-
nè inherens conspicitur spuma quædam candida, quæ nocte
ex illis emanat. Vtriusque flos cinerei coloris est, plurimùm-
que ad Rorismarini florem accedit. Vtriusque fructus admo-
dum similis est piperi nigro, acris gustus quidem, sed mini-
mè vrentis vii Piper, at Zingiberi propemodum paris.

ARBOREM moderatè calidam faciunt, & semini
paulò plus caloris tribuunt.

Facultates.

FOLIA, flores, fructus cōtusa, aut in aqua decocta, vel
in oleo fricta vtiliter imponuntur omnibus doloribus ex qua-
cumque causa prouenientibus: præsertim verò in articulo-
rum doloribus ex frigida causa natis, atque in tumoribus &
contusionibus, mirabiles præbet effectus. Vlceribus etiã ve-
tustis folia trita imponuntur, felici successu, quãdoquidem
eorum materiã digerunt, eaq; emundant & ad cicatricem
perducunt, modò corpus non sit impurum. Et sanè in vul-
neribus, apostematibus & contusionibus adeò vtilem expe-
riuntur, vt chirurgorum operam minimè requirant.

Foliorũ de-
coctum.

MVLIERES horum foliorum decocto omnitem-
pore vniversum corpus lauant; tantãque inuasi persuasio
apud illas, Negundo folia, flores & fructus vtilia esse ad iu-
uandum conceptum, vt eum qui contrarium persuadere co-
netur, lapidibus obruturæ sint.

OBSTETRICIBVS etiā quas illi Dayas vocant, Dayas.
apprimè nota est hæc arbor.

ADEO frequens est huius arboris vsus ad medendum Huius vsus.
in illis regionibus, vt nisi Deus præcisos ramos multiplici fœ-
tura renasci faceret, iam diu fuissent cōsumptæ arbores, aut
certè maximi pretij nunc essent: Sed quò magis præcidun-
tur rami, eò felicius renascuntur, perpetuāq; fronde virent.

DE NIMBO.

ALIA est arbor medico in vsu admodum commenda-
ta à Christianis & Gentilibus, reliquisq; earum Indie pro-
uinciarum incolis, rara tamen admodum: sed qui eam co-
gnoscant Nimbo appellant: Malabareses Bepole. Nomenclatura.

MAGNITVDINE est fraxini, cui procul aspicien-
tibus persimilis videtur: folia virinque viridia sunt, nec ab
altera parte incana lanugine pubescunt, in ambitu serrata
& mucronata: rami multis foliis luxuriāt, floribusq; abun-
dant exiguis, albis, quinque foliolis constantibus, flauis in
medio staminulis, Lotiq; siluestris siue trifolij odorati odo-
rem referentibus: fructus est paruis oliuis similis, subluteus,
cortice admodū tenui præditus, nasciturq; ex ramulorū alis. Nimbo ar-
boris histo-
ria.

HVIS arboris folia nōnihil amaricāt, saluberrimāq;
sunt trita & cum succo limonum imposita vulneribus sor-
didis, cuniculosis, callosisque cūm hominum tum iumento-
rum, digerunt enim, emundant, sarcotica sunt, & ad cica-
tricem perducunt. Foliorum item succus perutilis est siue
per os sumptus solus, aut ex vino, aut aqua, aut gallinæ iu-
sculo, siue vmbilico impositus solus, aut cū fellis bubuli mo-
mento, aut aceto, aut aloë, ad necandos & expellendos om-
nis generis lumbricos: quamobrem familiare admodum, &
perquam salubre medicamentum est omnibus illius regio-
nis incolis præsertim Malabar provincie, quoniam lumbrici
valde sunt obnoxij. Magnus est etiam eorum vsus tum
florum

Facultates.

florum & fructus in articulorū doloribus, tumoribus, membrorum debilitate, & apostematibus.

Eius oleum
neruorū do-
loribus vtile

O L E V M item ex eius fructu expressum, multo est in vsu in neruorum doloribus. Eoque vulnera, neruorum puncturas, & contractiones curant Malabareses.

DE IACA.

Iacæ natales

N A S C I T V R arbor in nonnullis Indiæ insulis secundum aquas, quæ licet nullum medicum vsum præbeat, propter amplitudinem tamen, & fructus elegantiam minimè prætermittenda est.

Et nomen-
clatura.

E A M Malabareses Iaca: Guzaratenses Panax: Canarini Panasu: Arabes Panax & Iaca nuncupant: Persæ matato p. in f. Faniar.

Eius descri-
ptio.

V A S T A est arbor, foliis palmaris amplitudinis prædita, dilutè virentibus, neruo crasso & duro per longitudinem excurrente: malum fert nō è germinibus aut foliorum sede, quemadmodum aliæ arbores, sed ex ipso trunco maioribusque ramis nascens, longum, crassum, obscurius virens, crasso duroque cortice tectum, vndique veluti adamantam cuspidibus septo, quæ in spinam breuem, viridem, nigroque aculeo præditam desinunt, admodum similem Durionis spinæ, sed minimè acutam aut pungentem, tamen si imitari videatur.

H O R V M fructuum minimus est maxime cucurbita amplitudine atque etiam maior, præsertim in Malabar, ubi præstantiores nascuntur: nam qui in Goa proueniunt, minores & peiores sunt atque magis insipidi. Cum maturus est hic fructus, bonum odorem spirat, eiusque duas differentias constituunt: Vnam Barca appellatam, & præstantiorem: alteram Papa aut Girasal dictam, minúsque bonam: deprehenditur postrema ex mollitie, quoniam si manu apprehendas, digitis cedit. Præstantissimi verò fructus pretium

qua-

quadraginta marauedis non excedit, hoc est, paulò plus regali Castellano. Per longitudinem secti hi fructus, intus candidi, & densa carne præditi apparent, ac veluti in capsulas aut receptacula diuisi, plena castaneis longioribus & crassioribus quàm sint dactyli siue palmulæ, cinerea tunica tectis, & intus albis castanearum vulgarium modo, gustu terrestri & aspero, si virides edantur, multòsque flatus generantibus: at si vti Hispanicæ castaneæ assentur, gustu sapido & venerem excitantibus, ob quam solam rem plebs frequentius vti solet. Sunt autem singula hæ castaneæ pulpa flauescente & aliquantulum lenta inuolutæ, & pulpam Durionis nonnihil referente, tametsi ab eo differat: grati saporis est, præsertim quæ in Iaca Barca cognominata continetur, optimi Melonis pulpæ admodum similis: dura tamen concoctionis est, & admodum grauat ventriculum: atque, vt illarum prouinciarum medici aiunt, si in ventriculo corrumpatur, noxios & venenosos humores generat: quiq; frequentius hoc fructu vescuntur, facile in pestilentem illum & pessimū morbum Morxi appellatū incidunt.

Eius facultates noxiæ.

Morxi morbus.

DE DVRIONE.

FRUCTVS est in Malaca adeò grati saporis & odoris, vt reliquis qui in ea prouincia gignuntur, tametsi plurimi sint & boni, præferendi videantur. Cuius præstantia, & quoniam Doctor ab Orta illius etiā meminit capite de Datura, licet eum non vidisset, me impulit vt de eo scriberem tãquam oculatus testis, tametsi in medicina nullum locum obtineat.

Durio vbi nascitur.

VOCATUR hic fructus in Malayo (quæ prouincia est vbi gignitur) Duriaon: ipsius flos Buaa: arbor ipsa Batan.

Eius nomenclatura.

PRÆGRANDIS est hæc arbor, materie valida & solida, crasso cinereoq; cortice tecta, multis ramis luxurians, Et qualitas

E & copiosum

& copiosum fructum præbens: flores habet ex albo nonnihil flavescentes, folia dimidi palmi longitudine, duorum aut amplius digitorum latitudine, in ambitu tenuiter serrata, parte externa dilutius virentia, interna verò saturiore virore, & quodammodo ad rufum tendente prædita: fructum Melonis magnitudine, dēso cortice septū, eoq; multis breuibus crassiq; & pungentibus aculeis horrente, foris viridi & veluti striis quibusdā quemadmodū Melo secundum longitudinem distincto: intus verò concamerationes quatuor secundum longitudinem habet singulas tria aut quatuor receptacula continentes, quibus singuli fructus insunt admodum candidi vti lactis pingue, magnitudine oui gallinacei, gustu suauiore odoratioreque quàm sit condimentum illud ab Hispanis Manjar blanco appellatum, non tamen adeò molles aut glutinosi: nam qui candore illo non sunt præditi sed flavescent, putridi sunt, aut aëris iniuria pluuiæue corrupti. Optimi censentur qui tres dumtaxat fructus in singulis concamerationibus, deinde qui quatuor obtinent: nam qui quinque habent, improbi censentur, quemadmodum & illi qui fissuras aliquas habent: non solent verò in singulis malis plures quàm viginti fructus contineri, iique singuli inclusum habent nucleum, mali persici nucleo similem, non rotundum sed oblongiusculum, gustu insipido, quique guttur exasperet, veluti messila viridia, propterea non eduntur.

Eius fructus
edendi ratio.

CALIDVS & humidus est hic fructus: & qui edere volunt, pede leuiter comprimere & frangere solent propter spinas quibus obsitus est.

QVI nunquam hos fructus ederunt, cū primū illos olfaciunt, videntur putridas cepas odorari: sed postquam degustarunt, præ reliquis cibis bene olere & sapere censent.

Eius vires.

EST verò tanta in existimatione, apud eos qui gula dediti sunt, hic fructus, vt putent neminē eo posse saturari, propterea varia dant illi epitheta. Memini videre quendam

Epigram.

Epigrammata ab eleganti Poëta in laudem eius conscripta: qua (si hic locus ferret vt adscriberentur) non dubito quin lectori plurimum essent placitura.

TANTA tamen est huius fructus in Malaca abundantia, vt singuli non pluris quam quatuor maraedis veneant, praesertim mensibus Iunio, Iulio, & Augusto: nam reliquis pretium intenditur pro hominum arbitrio.

Pretium & aestimatio.

ADMIRATIONE porro digna est Betele cum hoc fructu antipathia qua prosecto tanta est, vt si quis in nauem, Durionibus plenam, ad esue aut concamerationem, vbi adseruentur aliquot Betele folia reponat, corrumpantur & putrescant omnes. Et, sicut ex Durionum immodico esu ventriculus inflammetur & grauetur, folio Betele supra ventriculum imposito, subitò mitigatur inflammatio, tumorq; tollitur. Et, si à Durionum esu ingerantur aliquot Betele folia, nullam noxam sentiet, quantumuis multos ederit. Inde fit, tum etiam ob eius gustum suauem, vt vulgò dicatur, neminem eorum esu posse satiari.

Eius mira cum Betele antipathia & facultates.

DE MVSA* SEV FICV INDICA.

DECIM & octo aut viginti palmorum magnitudine attollitur haec pulchra & elegans arbor, cuius truncus ex multorum corticum sibi mutuo incumbentium cōiunctione constat, & humani cruris crassitiem adipiscitur, radice rotunda & crassa, Elephantorum grato pabulo: foliis nouem palmorum longitudine, duorum cum semisse latitudine, neruo satis crasso per longitudinē excurrente, & transuersis fibris in latera sparsis, parte superi re saturis, inferiore dilutioribus: ex huius arboris fastigio nascitur veluti thyrus quidam florum simul congestorum in modum pinei strobili coloris rufi: deinde vnicum ramum fert humani brachij crassitie in multos nodos diuisum, è quorum singulis decem aut quatuordecim dependent ficus, ita vt nonnunquam ra-

Musa: historia.

Eius variae
species.

mus centenis aut ducentenis ficibus onustus conspiciatur. Hos in diuersas species distinguunt Lusitani provinciam incolentes: nam Cenorins appellat qui admodum flauent, leues, longiusculi, gratique saporis sunt, & odoratiores: Chincapanoes verò qui virescunt nonnihil, longioresque sunt, itique etiam grati saporis. Laudantur praeterea qui in Cofula nascuntur, Aethiopibus Inninga dicti.

Nomenclatura.

LEGITIMUM autem nomen apud Arabes & Persas (vt è præstante medico Persa in Ormuz nato intellexi) est Mous, non autem Musa aut Amusa: arboris verò Daracht Mous. Reliqua nomina ex GARCIA petenda.

Eius arboris
ferendæ ratio.

SEMER duntaxat feritur hæc arbor; nam ex eius radice aliæ enascuntur: singula verò vnicum (quemadmodum retuli) fructuum ramum gestant, qui, dum maturi sunt, rescinditur, plantamque ipsam sponte exsiccari sinunt, tanquam in posterum inutilem, aut amputant, in domesticorum Elephantorum pabulum.

Eius usus.

NONNULLI interiora tenerioraque, antequam explicentur, folia, florumque thyrsus pipere, Zingiber recenti, allio, sale & aceto condiunt, & capparum modo edunt. Folia verò quoniam amplissima, mollia frigidaque sunt, substernere ad accumbendum in æstu solent: & ambustis nonnunquam imponunt. Ruellius huius fructus meminit ex auctoritate Theophrasti & Strabonis.

*Nemo meo iudicio accuratius hanc stirpem descripsit quam Ouiedus sub Platani nomine. Eius historiam Latinam fecimus, & scholiis in secundum GARCIAE librum cap. de Musa inseruimus.

DE MANGAS.

Mangas historia.

VASTA hæc est arbor & multis ramis prædita, fructumq; fert magna ex parte anserino ouo maiorem, nonnullis interdum Indiæ locis binas libras, aut amplius pendentem,

dent; in eadem verò arbore persæpe colore differentes isti fructus cõspiciuntur: alij enim dilutè virent, alij flauet, quidam etiam ex viridi rubescunt: grati admodum saporis odorisque est, & quando non est corruptus, duracinis persicis (quæ à carne firmiore flauaque Melocotonea vulgò appellantur) præstat.

IN multis prouinciis nascitur, vti in Malabar, Goa, Natales. Guzarate, Balagate, Bengala, Pegu, Malaca, alijsq; Indiæ locis, & in Ormuz vbi reliquis præcellit.

NOMINATUR Mangas: in Canarin Ambo: à Nomenclatura. Persis & Turcis Amba: permanetque in arbore ab Aprili in Nouembrem vsque interdum, pro locorũ natura & situ.

EDITVR hic fructus in laminas sectus aut sine vino, Eius fructus edendi condiendi, & conseruandi ratio. aut vino maceratus. Conditur etiam saccharo vt commodius adseruari possit, atque interdum cultello aperitur, & in eius meditullium Zingiber recens, allia, sinapi, sal, cum oleo & aceto insperguntur, vt vel cum oriza edant, vel oliuarum conditarum modo. Saliunt etiam & elixant, atque in forum venalem proferunt.

FRIGIDVS & humidus est, tametsi vulgus calidum constituat, & multas mordicationes in eorum qui vescuntur ventriculo parere affirmet. Quin & indigene medici calidum faciunt, & vituperant, dicentes serpiginem, erysipelas, biliosas febres, phlegmonas, & scabiem generare. Quod fortè accidit ab eius in ventriculo corruptione: sed eo tempore quo inuenitur hic fructus, propter immoderatum æstum, in similes morbos incidunt etiam nonnulli qui illo abstinent. Facultates.

ANTEQVAM probè maturus sit, gustu adstringente est, & ea pars quæ ossiculo vicinior est, acerbior: sed maturus dulcis & sapidus est. Præduro putamine, vndiquaque tomento, aut duris fibris transversim & obliquè excurrentibus operto tegitur nucleus longiusculus & crassiusculus,

magnitudine ilignea glandis, candidus & candida cute tectus, gustu amaro dum crudus est, ideoque aduersus lumbricos & alui profluvia utilis: tostus verò ilignas glandes sapit.

INVENITVR etiam huius genus sine ossiculo, palato admodum gratum.

Mangas siluestre aliud genus.

Et eius facultates.

ALIUD eius genus siluestre reperitur Māgas brauas nuncupatum, adeò presentis veneni, vt indigena illo sese mutuo perimant: nam si quis paululum ederit, ilicò moritur: interdum oleum admiscunt ad exacuendam eius vim, vtq; celeriore perniciem adferat: sed quocumque tandem modo sumptum, adeò ceteriter perimit, vt hactenus nullum sit repertum antidotum ad eius vim compescendam. Dilute viret, & aliquantulum splendet, lacteo succo abundat, paucaq; carne præditus est, nam crasso cortice solummodo integitur ossiculum prædurum & cartilagineum, Cotonei tamen mali magnitudine est.

Natales.

PER vniuersam prouinciam Malabar prouenit copiosè hæc arbor, domestica siue satiuæ minor, breuioribusq; & crassioribus foliis. Pueri his fructibus, aureorum malorum loco sese mutuo petere consueuerunt.

DE ANANAS.

Natales.

PEREGRINVS est hic fructus, & ex prouincia S. Crucis in Brasilia primum in Indiam Occidentalem, deinde etiam in Orientalem Indiam delatus, in quibus nunc vberimè prouenit.

Alius historia.

CITRII verò mali minoris magnitudine est, admodum flauus & odoratus cum probè maturus est, adeò vt prætereuntes ex odore dignoscere queant ades in quibus sit: succulentus & gratissimæ saporis, procul intuentibus cinara videtur, sed pungentibus aculeis caret. Singula stirpes Cardui edulis magnitudinem æquant, unicūque malum gestans

gestant in medio quasi caule, & circa eum multas alias proles, quarum nonnullæ etiam suo fructu præditæ sunt. Quæ itaque fructus maturos colligunt, proles ilicò terræ mādare solent: è quibus singulæ deinde stirpes proueniunt suo malo onustæ, uti mater, quæ intra annum spatium colliguntur. Eius radix carduo eduli perquam similis est, sed & folia non sunt disparia, tametsi ad Ananas siluestris folia magis accedant, Vulgo Ananas vocant: Canarini verò Ananasa.

CVM primum in Indiam illatus est hic fructus, singuli decem ducatis, aut paulò amplius æstimati sunt: nunc verò propter abundantiam (tametsi neque sapore neque odore primis cedāt) vix duobus regalibus Castellanis veneūt.

HACTENVS in medicū vsum non est receptus, sed solummodo ob saporis gratiam commendatur. Calidus & humidus est, editurq; maceratus in vino uti Persicū malocotoneum, & facilis est concoctionis; nimius tamē eius vsus inflammationes parit quemadmodū Duriones Malacenses.

Eius vsus.

SI medius secetur, & partes denuo coniungantur, vniuntur uti cucumeres: perfossus verò cultello, si in vulnere vnius diei aut noctis spatium cultellus relinquatur, inuenietur tota ea pars quæ in vulnere hæsit absumpta.

*Confule nostras annotationes in. 2. lib. Aromatum Capite de Mangas.

DE ANANAS SILVESTRI.

ALTIVS assurgit qui Ananas siluestris nuncupatur: namque truncum habet hastæ magnitudine lauem admodum, rotundum & Mali aureæ crassitie, spinis horridum: folia spinosis cuspidibus prædita, & per ambitum mollibus spinis septa. Singulæ arbores secundum radicem summa tellure magnam foliorum comam fundunt, maiorum quàm quæ in arbore sunt, quæq; procul intuentibus Aloës foliis si-

Ananas siluestris descriptio.

milima videantur, tenuiorum tamen, pluribus spinis horridorum, & dilute virentium: adnatis se propagat, aliaque stirpes ex aliis enascuntur, praesertim in sepibus & hortorum ambitu quos egre gē muniūt. Rami foliorum simul glomeratorum capita proferunt flauentium admodum, & tenerorum, suauissimi odoris, quae nihil aliud sunt quam flos ipse: ex horum singulis spica prodit Arundinis spica non dissimilis, sed crassior, compactior, & elegantior, odore Cedri. E ramis dependent fructus Ananas brauo, id est, Ananas siluestres dicti, quoniam cum domesticis nonnullam habeant similitudinem, Melonis magnitudine, coloris rubri elegantis & oculos oblectantis, toti in partes diuisi quemadmodum Cupressini strobili seu nuces exsiccatae, sed tuberculis foris obsiti, ut procul spectantibus magni pinei strobili appareant.

CAPITVM teneriora folia seu flores crudi eduntur
Cuius facultatis sit. carduosque sapiunt, sed exiguum alimentum praebent.

FRUCTVS (quem pauci degustant) sapore utcumque suauis praeditus est, adstrictionis tamen austeræ, & palato parum gratæ particeps.

SUCCI plena est tota planta cum suis radicibus. Huius sex vel octo unciae ex saccharo summo mane sumptæ praesentissimum certissimumque censentur esse remedium aduersus iecoris & renum calores, renum ulcera, purulentas urinas, & penis excoriationem: nam magna ex parte post tertium diem sanantur.

VTILEM etiam in diabete esse ferunt: at non sum expertus.

ARABES admodum laudant aduersus eosdem morbos & erysipelas; & Queura vocant, quemadmodum in Decan; Persæ Ananasa, & Angali: florem (qui caput illud foliorum odoratum est) Arabes Chuxtaid, Persæ Pixcoxbuith dicunt: Turcis est ignota.

*Habet hæc planta aliquot notas non dissimiles Aloë Americanæ.

DE CARCAPVLI.

CARCAPVLI Malabaribus, Garcapuli Canari- Carcapuli
historia.
nis, vasta magnitudinis arbor est, fructum ferens malo au-
reo cui cortex exemptus sit, magnitudine & forma similem,
ex grumis omnino constantem, (sed non separabilibus ab
inuicem ut in malo aureo,) tenui, leuiq; & splendenti corti-
ce tectum, non admodum sicco, colore pallido, at ubi maturuit
aureo: gustu admodum austero, sed quadam adstrictione grato.

Eo vtuntur in cibis, magnaq; apud incolas eius est laus in Eius vsus.
curationibus: sed inter omnes quae experientia comprobatae
sunt primas obtinet profluuij alui cuiusque generis constri-
ctio, in iis praesertim qui nimio veneris vsu hoc malum con-
traxerunt: editur vero aut ipse fructus maturus, aut eius
succus cum oxygala sumitur, aut illius exsiccati puluis: cum
oxygala autem mixtus & cocta oriza, mirifice appetitum
deiectum reuocat. Vtilis etiam est eius succus, & exsiccati
puluis in oculorum caliginibus & suffusionibus. Familiaris
est eius fructus puluis obstetricibus, eum enim puerperis ex-
hibere solent ad pellendas secundas, & ad purgationes, atq;
lactis vbertatem praestandam, tum etiam ad facilitandum
partum magna ut aiunt efficacia.

SUCCVS eius cum aliis platis mixtus vngui maioris
digiti pedis imponitur eodem latere quo quis aut caliginem,
aut suffusionis initium in oculo habet, utilemque esse perhi-
bent.

TRANSFERTVR hic fructus siccus ex Malabar in
alias prouincias.

DE CARAMBOLAS.

FRVCTVS quem Malabares & Lusitani Caram- Carambola
historia.
bolas appellant, in Deca Camarix, in Canara Camarix &
Carabeli, in Malayo Bolimba, & a Persis Chamaroch

E S dicitur;

dicitur; nascitur in arbore cotonea magnitudine, foliis malis, paulò longioribus, coloris viridis saturatioris, & gustus amaricantis: floribus parvis quinque foliolis constantibus ex albo rufescentibus, nullo quidem odore gratis, sed aspectu elegantibus, & gustu oxalidis acetoso. Ipse verò fructus maiusculi oui gallinacei magnitudinem aequat, oblongus, flavescent, atque veluti in quatuor partes diuisus, sulcis illis paulò altius impressis magnam gratiam addentibus: in meditullio continet semina tenera saporis aciditate palato grata.

Eius vsus.

MULTI vsus est in medicina & in cibis: nāque maturum exhibent in biliosis febribus, & saccharo conditum, syrupi acetosi loco prabent. Canarini eius succo, cum aliis medicamentis istic nascentibus, collyria parare solēt ad oculorum nubeculas tollendas. Obstetricem (quæ illis Daya dicitur) vidi fructu sicco & in puluerem contrito, & foliis Be-tele vtentem ad secundinas à partu expellendas, fœtumq; mortuum educendum.

EIVS etiam muria cōditi frequens est vsus, cūm gratissimi sit saporis, & appetentiam excitet.

DE IAMBOS.

ALIVS est in India fructus, qui ob aspectus elegantiam, suauemq; odorem & saporem, tum etiam ob eius in medicina vsum, dignus est cuius historiam hīc apponam.

Iambos historia.

ARBOR verò quæ hunc fructum prabet, vasta est, maximam malū aureā quæ in Hispaniis nascatur æquans, multis ramis in latum expansis, multamq; vmbra præbentibus prædita, aspectuq; pulcherrima; caudex maioreſq; rami cinereo cortice integuntur: folia pulcherrima sunt, leuia, palmū aut amplius longa, crassiore neruo per longitudinem, multis autem obliquis venis in latera excurrentibus, parte superna saturatius, inferna verò dilutius virētia: flores ex rubro purpurascētes, viuidi admodum coloris, multis staminibus

minibus in medio præditi, aspectu pulcherrimi, gustu capreolorū vitis simili: Fructus magnitudine est pyri quod à Rege cognomen accepit, eiusq; duo sunt genera: vnus enim adeo obscure rubet vt niger videatur, magnaq; ex parte ossiculo caret, & succi bonitate præstat: alter ex candido rubescit, & ossiculum continet album, durum, non admodum rotundum, ossiculi quod in persico malo est magnitudine, læue, & candida hirsutaq; membrana tectum, qui licet superiori bonitate cedat, dignus tamen est delicatissimorum etiam hominum palato; vtriusque odor suauissimam rosam refert Frigidus & humidus est, & admodum tener, cortice adeo tenui & molli tectus, vt cultello auferri non queat.

ALTE suas radices terræ insigit hæc arbor, & post quartum annum fit fructifera: fructum sæpius eodem anno perficit, & nunquam sine flore aut fructu conspicitur, cum iidem rami floribus, fructu viridi & maturo semper ferè onusti sint, decidentibusq; quotidie floribus (sic vt solum rubro colore tinctum quandoque videatur) noui subnascantur, fructusq; alij primū enascantur, alij maturescant, alij iam maturi colligantur. Succussa arbore maturi facile decidunt: comprehensi verò rami ad fructus colligendos, facillimè ab arbore reuelluntur. Ante reliquos cibos initio mensæ edi solent atque interdum.

MALABARES & Canarini hūc fructum Iamboli Nomenclatura varia. vocant: Lusitani istic habitantes Iambos, Arabes Tupha Indi, Persæ Tuphat, Turci Alma: Lusitani arbore Iambeiro appellant.

FLORES & fructus saccharo cōdiri solēt, iisq; frequen- Facultates. ter vtuntur in biliosis febribus, & extinguendæ sitis gratia.

DE IAMBOLAINS.

HUIVS arboris materies cortice integitur coloris ferè Iamboloins historia. eiusdem cum Lentisci cortice; folia Arbuti similia habet, sed

sed Myrti virentis foliorū sapore: fructus Cordubēsis olivis maturis similes, adstringentis gustus, & fauces cōtrahentis.

Sius vsus. N V L L V M vsum in medicina obtinent, sed eduntur cum Oriza cocta, nam appetentiam excitant.

V V L G V S Iamboloins appellat.

DE IANGOMAS.

Iangomas descriptio. A L I V S est fructus Iangomas nuncupatus, Sorbis ferè similis colore, & immaturis prunis sapore: quibus & arborem similem habet, (sed spinis obsitam) & folia & flores.

Natales. N A S C I T V R cum spōte in agris, & in hortis etiam colitur.

Vsus. F R V C T V S licet maturus digitis prius emolliendus est, antequam edi possit: attamen adstrictionem illam haud mediocrem, nequaquam adhuc deponit: eaq; de causa illius vsus est ubi adstrictione opus habent.

DE MALIS INDICIS.

Malorū Indicarū historia. M A G N A est arbor multis foliis & floribus prædita, & copioso fructu: folia minus rotūda sunt mali foliis, tametsi ea æmulentur: supernè saturatè virent, infernè candicant & pubescunt vti Salvia folia, gustu adstringente: flores exigui, candidi, quinque foliolis constantes, inodori: fructus iuiubis seu Zizyphis similes, alijs aliis maiores & suaviores, nunquam verò tam probe maturescentes vt conservari queant & in alias regiones trāsferri vti zizypha, & perpetuò nonnihil adstrictionis retinentes: vnde colligitur minimè pectori vtilis esse quemadmodum zizypha.

Earum nomenclatura. H V I C arbori nomen est in Canara Bor, in Decā Ber, & in Malayo Vidaras, apud Lusitanos Mançanas de la India, id est, mala Indica.

Præstantia. P R Æ F E R V N T V R fructus in Malaca nati Malabaricis: sed iis adhuc præstantiores quos Balagate profert.

C O N -

CONSPICITVR hæc arbor æstate alatis formicis
perpetuò onusta, quæ in ramis eius Laccam elaborant.

DE AMBARE.

CRASSA magnâque est hæc arbor, foliâque habet Ambare
descriptio.
Iuglandis foliis magnitudine respondentia, sed non eius for-
mæ, dilutius virentia, & multis venis elaborata, quæ illis
magnam gratiam addunt: flores exiguos candidos, fructus
Iuglandis nucis magnitudine dilutius virentes, & cortice
quàm illa leuiore: odoris grauis & gustus acerbi dum adhuc
virent, coloris verò flauis in maturis, gratioris odoris, & gu-
stus grata aciditate commendabilis, medullam continentes
cartilaginosa & duram, è duris nervis obliquè intertextis
constantem.

HANC arborem appellât Canarini Ambare, fructum Nomencla-
tura.
Ambares, Persæ Ambereth, Turci Harb, Lusitani Am-
bares quemadmodum Canarini.

PROPTER fructus gratiã aciditatẽ eũ Omphacij Eius vsus
seu agrestæ loco cibis admiscunt: maturum ex sale & aceto
edunt, excitat enim edendi appetitũ. Indi aduersus biliosos
humores vtilem esse perhibent.

SALE & aceto conditus diu conseruari potest.

Eius condi-
endi ratio.

DE DATVRA.

TRIA sunt huius plântæ genera, quorum quo frequen- Daturæ tria
genera.
tius vtuntur, primo loco describemus: eius enim adeò vulga-
ris est vsus, vt paucæ sint meretrices, quæ inter sua κερήλια
illud non recondant, ob eas quas postea subnectemus causas.

PRIMUM Altheæ magnitudine caulem habet, nec Prioris de-
scriptio.
admodum illi dissimilem, in plures tamen ramos diuisum:
folia cum magnitudine tum forma Stramonie foliis simili-
ma, verum magis in circuitu serrata, vti ferè Xanthij folia:
flores albos, Smilacis leuis (quã Hispani Correguela ma-
yor

yor, hoc est, Conuoluulum maiorem appellant) floribus omnino respondentibus, fructum Stramonie, rotundum, nucem Iuglandem magnitudine equantem, viridi colore preditum, & spinis mollibus, minimèque pungentibus vndique septum, plenū semine Lenticulæ simili, eiusdemque coloris, cordis humani effigie, gustus amari: radicē albā, raphani odore, quæque si diu naribus admoueat, sternutamenta ciet, cuius cortex nonnihil amaricat, minus tamē eo qui caulē & ramos ambit.

Natales.

NASCITUR vmbrosis locis, & secundum aquas.

Nomenclatura.

NOMEN huic plātæ in Malabar est Vnmata caya, in Canara Datiro, apud Arabes Marana: apud Persas & Turcos Datula: apud Lusitanos Datura & la Burladora, hoc est, faceta.

Qualitas.

LITERATI plerique, atque etiā maxima pars Medicorum istic degentium, legitimā Nucem Methel Arabum esse censent, frigidamque excessu tertio, & siccam secundi sine constituunt.

Facultates.

MALA inualuit consuetudo apud impudicas mulieres, ut huius seminis in puluerem triti dimidiam drachmam ex vino, aut alia quæ magis arridet materia prabeant: miser qui eum hausit diu velut mente alienatus remanet, aut ridens, aut eiulans, aut dormiens, plerumque etiam alteri colloquens & respondens, ut interdum etiam sana mente preditum esse credas, tametsi mentis non sit compos, neque eum agnoscat, cum quo sermones cōfert, & colloquij habiti planè sit immemor, postquā ad se rediit. Sunt verò nonnulla adeo exercitata in hoc medicamēto exhibendo, idque sic temperare norunt, ut ad certas, eaque quot velint horas, quibus id propinant, mentem adimant. Multa sanè eius rei exempla, quæ vel ego ipse vidi, vel ab aliis audiui, huc adducere possem; sed cum ad rem nihil faciant, prætermittenda esse duxi: illud solum addam, neminem qui simile sumpsisset, necatum ynquā comperisse, tametsi nonnullos conspexerim

per

per aliquot dies perturbatos ferri, quod fortè acciderat ob immodicam quantitatem exhibitam: quæ si fuerit nimia, interimit; quoniam hoc semen perniciofa qualitate non caret, licet Gentiles ad prouocandas vrinas cum pipere & foliis Betele id exhibere soleant, & perutile esse dicant. Ego verò nunquam obseruaui, nec experiri volui, cùm alia medicamenta ad eam rem vtilia non desint.

PORRO si ad eorum qui hoc semen hauserunt curam Vires variæ euocentur Hispani medici, medicamenta vomitum cientia exhibēt, vt quidquid in vētriculo hæsit reiiciant; acres deinde clysteres iniiciunt ad euacuandum, fortesq; ligaturas adhibent ad diuertendum, tum etiam cucurbitulas adponunt & venam secant. Gentiles verò medici & Christiani indigenæ cùm à cucurbitulis & venæ sectione abhorreant, nihil aliud quàm vomitum prouocant, fortesq; ligaturas & fricationes adhibent, quæ si non sufficiant, balnea ex aqua calida præscribunt ad eliciendum sudorem: porrò à vomitu vinum propinant, cui piper & cinamomum admiscent; in cibis verò audaciores sunt Hispanis: nāque euacuata materia gallinas edendas præbent, & vinum dulce aut passum exhibent.

RADICIS Daturæ drachma ex vino pota somnum profundum inducit, in quo varia insomnia, & miræ rerum facies obuersantur.

SEMINI verò per noctem in aceto macerato, deinde exactè trito vtiliter illinuntur herpes miliares & erysipellata serpentia: nam breui sanantur.

RELIQVA duo genera facie & fructu superiori II. & III. descriptio. ferè respondent, sed flores colore variant: etenim secundæ flores, licet forma priori sint similes, colore tamē flauo sunt, & secundum pediculum nonnihil rubent: tertij flores hyoscyami floribus magis accedunt. Ceterum neutro ex postremis duobus vritur, nisi ad necem inferendam. Nihilominus
tamen

tamen Brachmenes medici ex secundi semine (quod floribus est flauis) catapotia faciunt, granorum piperis magnitudine, magna sanè efficacia ad sistenda alui profluvia, quibus adiuncta sit febris ardens, atque etiam in dysenteris: Fiunt verò hunc in modum catapotia.

℞ seminis secundi generis drachmam vnā, piperis nigri & longi, sandali albi, atincar, radicū Bīsa (adfertur ea ex Bengala & Patanne montibus) foliorum Banguē, singulorum dimidiā drachmā: omnia ista diligenter cum aqua terunt in marmore, quo pictores suos colores terere solent, deinde catapotia efformant, è quibus exhibent quantum commodum videtur.

Nux Methel-
la est Stramo-
niz fructus.

ME A est cum aliis plerisque opinio, vt nucē Methel- lam Stramonie fructum esse credam, qui per omnia simili-
lus est fructui Daturæ: atque si nonnihil ab eo differt, id lo-
corum varietati adscribendum censeo.

Tatula.

*Quantum ex Daturæ primæ descriptione colligere licet, ea-
dem est cum Turcorum qui Constantinopoli viuunt Tatula,
cuius vsus illis perquam familiaris est.

DE BANGVE.

Banguē de-
scriptio.

BANGVE simile ferè est Cannabi cuius Dioscorid. lib. 3. meminit. Caulem habet quinque palmorum longitu-
dine. quadrangulum, colore dilutius virente, fractu contu-
macem, nec adeò concuum, vt cannabinus caulis, cuius
cortex nō minus quàm illius in fila diduci potest: folia can-
nabina supernè virentia, infernè incana lanugine pube-
scentia, gustu terrestri & insipido: semē cannabino minus,
neque adeò candidum.

Eius vtilitas.

INDI semine & foliis vescuntur, cum vt validiores in
re venerea fiant, tum ad excitandam cibi appetentiam.

Compositio.

FIT ex hoc Banguē compositio vulgaris admodum
vsus in iis regionibus, ad varios effectus: etenim magnates
& mili-

& militia praefecti, vt laborum obliti, securius & liberius dormiāt, seminis & foliorum in puluerem redactorū quantum videtur sumūt, illiq; addūt Arecam siue auellanam Indicam viridem, opij nonnihil pro arbitrio: omnia saccharo excepta deuorant: si verò in somno varias rerum species sibi obuersari cupiunt, addunt praeterea selectissimam Camphoram, Caryophyllos, Nucem moschatam & Macis: si verò bilares esse volunt & faceti, & praesertim in venerem procliuiores, ambaro & moscho additis saccharo excipiant, & electarium faciunt.

ad quid pro-
fit.

MULTI mihi affirmarunt huius semen & folia ad libidinem ciendam mirae esse efficacie: vnde colligere licet, nihil affinitatis habere cum Cannabi, licet illi admodum similis sit, quandoquidem auctore Dioscoride loco supra dicto Cannabis calida & sicca est, & genituram extinguit.

DICITVR Arabibus Axix, Persis, Decan & plurimarum aliarum regionum incolis Bāgue; Turcis Asarath.

Nomenclatura.

Sed & hoc Bāgue plurimā affinitatem habere videtur cum Turcorum Constantinopoli degentium Mañac: quo ad varios effectus vtuntur: nonnulli etiam velsuntur excitandæ veneris gratia.

Mañac.

DE HERBA VIVA.

NONNULLIS Asiae locis planta quedam inuenitur, vulgo Herba viua nūcupata, à circumforaneis illis Iogues appellatis, Herba amoris, ab Arabibus & Turcis Suluc, & à Persis Suluque.

Herbae viuae
nomenclatura

EXIGVAM habet radicem, è qua supra terram exiliunt octo ramuli duos digitos longi, foliis vtrinque in ordine digestis & inter se respondentibus onusti, quæ plurimum ad Erui tenella folia accedunt, nec dissimilia sunt foliis prioris Polypodij, cuius iconem Lacuna exhibet lib. 4. cap. 187. sed longè tenuiora, & vtrinq. lenia, & grato virore oculos pascentia, vt Tamarindorum folia: è medio radicis capite

Eius historia

F

exiliunt

exiliunt pedūculi (nam caule caret) quatuor, singuli suam florem sustinentes flauum, aspectu pulcherrimum minoribus Caryophylleis similem, sed sine odore.

Natales.

NASCITUR calidis & humidis locis.

Mira eius
natura.

ADEO mira est huius plantulae natura, ut eam humana ratio assequi nequeat. Nam cum maxime viret, gratissimaeque est aspectu, si quis illam apprehendere cupiat, ilico folia contrahit, atque sub tennes ramulos recondit; si vero apprehēdat, subito adeo marcida cōspicitur, ut exsiccare putet: sed quod maiore admiratione dignū est, si manū retrahat, ilico suum nitore recuperat, & toties marcescit aut reuirescit quoties cōprehenditur, aut manus ab ea retrahitur.

MIHI autem relatum est Philosophum quendam in Malabar dum nimis curiose huius plantae naturam obseruare cupit, amentē esse redduū. Plantā ego conspexi, eamq; cum suo cespite, ipsam minimē cōtingens, erui, & in hortum quendā trāstuli, ubi permansit; at satuū minimē vidi.

Facultates.

INTERROGATI à me nonnulli indigenae medici, an aliquas huius plantae facultates perspectas haberent, illamq; in vsum medicum adhiberent, affirmarunt vtilem esse ad virgines corruptas in integrum (si credere fas est) restituendas & ad reconciliandum amorem mirae esse efficaciae. Gentilis medicus & pro ea regione satis doctus, cum adeo cupidum cognoscendi huius herbae facultates conspiceret, ait, vnam se edoctrum adeo compertā & certam ut ceruicē pro pignore deponeret, nisi eam sic se habere comperirē. Nempe ut illi cuiuspiā mulieris, qualiscunq; etiam status, nomē modò indicārē, se effecturū ut illa in omnibus mihi obsequeretur, dūmodo ex ipsius praescripto herba vterer. Sed conditionem respui quandoquidē res adeo illicita esset. Nihil igitur aliud post diligentē inquisitionē de hac plāta intelligere potui, quā apud Gētiles, praesertim verò Brachimenes Canarinos & Iogues in magna aestimatione esse.

QVO.

QVODAM die mihi accidit plantas conquiriti non procul a flumine Mangate vt Gentilem quēdam humi sedentem & verba quēdam obmurmurantē, tanquam oraret, fortē conspicerem; quē cū compellassem, nihil respondit, sed meo interpreti quem comitem duxeram, manu duntaxat innuit: is hominem intelligens, celeriter sese inde proripuit, mēque secedere iussit, inquiens Gentilem illum incantatorem esse cuiusdam illius regionis Capitanei quem Caymal appellant, & istic sortes iacere supra Herbam viuam, id fieri solere repurgato prius circa ipsam plantā solo ad hominis longitudinem, recitarique quēdam concepta verba, & expectari primam auem aut rem animatam quę istam plantam prætergrederetur dū verba obmurmuraret, cuius sanguine (si comprehendi posset) perluenda esset, sin minus, alterius eiusdē speciei, idq; cum multis ceremoniis, quas prætermitto, cū indignæ sint vt scriptis mandentur. Conspexi deinde istam plantam siccam inter supellectilem mulieris prostitute pudicitie.

* Ea esse videtur quam Garcias libro Aromatū describit foliis Polypodij nullo nomine addito.

DE HERBA MIMOSA.

ALIA planta inuenitur in quibusdam hortis quinque palmorum longitudinis, & vicinis arbutus aut parietibus incumbens, tenui caule, eleganti virore prædito nec admodū rotundo, per intervalla exiguis & pungentibus spinis obsito, foliis superioribus haud absimilibus, filicis femina foliis minoribus.

Herba mimosa, historia.

GAUDET humidis & petrosis: & Herba mimosa Natales. nuncupatur, quoniam manu admota senescit & marcescit, manu verò remota pristinum virorem recipit, sed non adeo celeriter vti prior.

NATURAM habet plurimum ab Arbore tristi differentem: nam singulis noctibus Sole occidente senescit & siccatur quodammodo, sic vt contabuisse videatur; Oriente

Natura.

verò Sole vigorem denuò recipit, quantòque Sol magis feruet, eò magis viret, totòque die folia ad Solem conuertit.

Odor & sa-
por.

Vires.

Quibus cum
plantis con-
ueniat.

ODORE & sapore est Glycyrrhizæ: vulgòque ab indigenis folia manduntur aduersus tuſſim, ad pectus repurgandum, & vocem clariorem: renum etiam doloribus utilis esse cenſetur, & recentia vulnera glutinat.

* Multis notis hæc planta conuenit cum Fœnogræco ſilueſtri Tragi, ſive Polygalo Cordi & Glycyrrhiza ſilueſtri Geſneri, cuius folia & radices deguſtata Glycyrrhizam ſapiunt: nam eius folia noctu interdum contrahuntur (quod in multis leguminaceis plantis uſu venit) at ſpinis caret caulis, niſi pro ſpinis ſumere libeat tenues illas & mucronatas appendices ſedi foliorum alatorum inhærentes.

DE PINEIS NUCLEIS MALVCANIS.

Pineorū nu-
cleorum de-
ſcriptio.

ALITVR in hortis quibuſdam Malabar, tum etiam in nonnullis ſiluis ſponte naſcitur Arbor magnitudine Pyri, cuius folia infernè diluto virore prædita ſunt, ſupernè autem ſaturo, admodū tenella & mollia, quæ guſtata valde acris deprehenduntur, & linguam diu vellicant: fructus triangularis, auellane magnitudine, interius in multa receptacula diſtinctus, in quibus ſemen eſt album, ſolidum, rotundum, pineo nucleo ſuo putamine exempto par.

Eorum uſus.

EO fructu frequenter vtuntur Indi, cū in curandis quibuſdam morbis, tum etiam in ſuis nequitis.

BINOS eiſmodi nucleos tenui membrana quæ illos contegit liberatos terūt, & clyſteribus vulgaribus admiscēt aduersus Sciaticam, & vrinæ difficultatem: ſeu propinant cum gallinæ uſculo ad educēdos putridos, lentos, craſſosq; & frigidos humores, & aſthmaticos curandos, aduersus quem morbum plurimum cōmendant, & frequenter vtuntur. Ex aqua tritis impetigines inunctæ primū tamen diligēter conſcricate & abraſæ, probè & breui temporis ſpatio curantur: ſed admodum vrunt, vt experientia didici.

IMPROBÆ etiam mulieres illarum prouinciarum ſuis

suis maritis parum equa, quatuor grana siue nucleos edendos praebeant, vt eos interimant.

V V L G O appellatur hic fructus Piñones de Maluco, Fructus nomenclatura.
 hoc est, pinei nuclei Malucani, quod istic frequētes sint arbores hunc fructum ferentes, multusq; & familiaris admodum sit illius vsus in purgationibus: à Canarinis Gepalu.

DE CHARAMEIS.

H V I V S arboris duo sunt genera: Vnum mespili amplitudine, foliis pyro similibus, dilute virentibus, fructu ael- Duo genera Prioris descriptione.
 lanis simili admodū flauo, eleganter in multos angulos desinente, sapore omphacij, & grata aciditate, quem vel immaturum vel maturum vel sale conditū vulgariter edunt.

A L T E R V M genus eiusdem est magnitudinis, foliaq; Alterius historia.
 habet malo minora, fructum verò priore maiorem, cuius decocto cum Santalis aduersus febres vñtur Canarini medici.

C R E S C I T in siluis & montibus procul à mari disitis. Natales.

E primi generis quod secundum aquas nascitur, arboribus, seligunt Decanini & Canarini eam quae longius à mari abest; eius radiceis corticem (cui lacteus succus inest) quatuor digitorum longitudine sumentes cum drachma sinapi probè terunt, & asthmaticis exhibent: valenter enim purgat per aluum & vomitum. Quod si immodica subsequatur euacuatio, Carābolas fructum vnum viridē edunt, vel aceti Canarini haustū sumūt (quod nihil aliud est quàm aqua decoctionis orizae vno aut altero die reseruata donec aciscat Canarinis aceti vices praebeas, & medicū vsu praestans) & si profluuium non cessat, aegris caput frigida abluunt. Prioris generis vsus.

M A G N V S est horum Charameis vsus in illis prouinciis, & ad orexim ciendā, edere solent immaturos, maturos, salitos, vel sale & aceto conditos vt antè dixi; aut aliis edulis quibus aciditatem conciliare volunt admiscunt.

V O C A N T V R in Canara, Decan, & vulgo Charameis; Arabibus, Persis & Turcis Ambela, Nomenclatura.

DE HERBA MALVCANA.

Herbæ Ma-
lucanæ hi-
storia.

DVORVM aut trium cubitorum longitudinem ad-
quirat hæc planta, nonnunquam etiam locis vberioribus &
humidis, quinque cubitos superans, eleganti virore prædita,
caule tenui, tenero, nonnihil concauo, imbecillo, & nisi vi-
lasmixum pergulis sustineatur, humi sese diffundente,
quemadmodum hedera, & multos ramos spargente, qui
subinde radices agunt ut Mentha & Melissophyllum,
adeoque serpunt, ut planta sola vel ramus transpositus breui
temporis spatio magnum locum occupet: folia habet tenella
& mollia, in ambitu serrata, magnitudine & forma Sam-
buci foliis respondētia: flore croceū Chamemeli flori admo-
dū simile, paulo tamē maiore. Toto anno virescit & luxuriat.

Nomencla-
tura.

VVLGO nuncupatur Remedium pauperum, & de-
structio Chirurgorum; Canarini Brungara aradua appel-
lant, id est, quæ flore est croceo.

Vsus.

FREQVENTER viatur cum in Maluco (vnde pri-
mam originem traxisse creditur, quod istuc abunde nasca-
tur, & plurima admisceatur Chirurgicis remediis) tum in
omnibus Indiæ provinciis, in quibus diligenter colitur, & in
pretio habetur, nec iniuria.

ex eo vngue-
tum mirè ef-
ficax.

COQVNTVR huius plantæ folia in oleo, & cum
cera inspissantur vnguenti modo: mirifice curat id vnguen-
tum omnis generis vlcera cum recētia tū antiqua, etiam si
sanguinolenta, sordida, cuniculosa, maligna & putrida sint:
mirè esse efficacie deprehendi in tibiæ vulnere inue-
teratis, & recentibus vulnerebus.

Alia huius
stirpis vtēda
ratio.

ALIA est præterea huius stirpis vtēda ratio. Eius
enim caulem & ramos superiore cortice denudant, & su-
munt membranam illam tenuem quæ media est inter ex-
teriorem corticem & caulem, quæq; facile, uti in cannabi,
reuellitur: eam oleo nucis Indiæ madentem, ipsius plantæ
foliis

foliis inuoluunt, & sub cineribus calidis recondunt: vbi incaluerit & emollita fuerit, conterunt, & recentibus cruentisq; vulneribus imponunt seu grandia sint, seu minora: & paucis diebus non sine admiratione conglutinant absque vlla inflammatione aut apostemate: lenit enim dolorem, sanguinisq; fluxum cohibet; breuiter, nullo alio medicamento adhibito omnino ad cicatricē perducit: singulare etiā perhibent esse remediū aduersus neruorū pūctiones & vulnera.

EODEM præterea modo adhibetur in apostemate aperto ad emundandum, carnem generandum, & ad cicatricem perducendum: item in inueteratis vlceribus & cuniculosis, in quibus ea solummodo trita interdū apponitur. Vires variæ.

PORRO quoniam ista remedia huius plantæ certissima sunt, vulgariter iis vtuntur in vniuersis illis prouinciis, & magna habet in æstimatione: multi præterea alij qui inde nauigant vnguentum ex hac herba cum oleo & cera confectum, secum efferre solent, tantam fiduciam in eo collocantes, quasi omnia chirurgica remedia apud se haberent: itaque quacunque occasione in qua chirurgorum opera requiri posset, subito ad vnguentum ex herba Malucana confectum confugiunt, tanquam indubitatum remedium. Vnguentum omnia chirurgica remedia continere creditum.

DE SARGAÇO.

IN celebri illa nec minus metuenda nauigatione del Sargaço (sic enim totū illud Oceani spatiū à decimo octauo gradu ad trigesimum quartum ab æquinoctiali ad Septentrionē tendens, qui in Indias nauigant, appellant) conspicitur profundū & spatiosum æquor tectū herba quadā Sarguaço nuncupata, palmum longa, tenuibus ramulis in glomos conuoluta, foliis angustis, tenuibus, & dimidiam vnciam longis, in ambitu admodū serratis, colore subrufo, gustu insipido, siue insensibili mordicatione prædito, qui potius ex aquæ salugine cōtractus, quàm ipsi plantæ imatus videatur. Ad Vbi Sargaço inuenitur.

singu-

singulorū foliorū exortus inheret semē rotundū vti granum piperis vani & vacui, tenui corallio albo, interdū autem corallio rubro & albo omnino elaboratū, tenerū admodū dum primum ex aqua educitur, & durū si exsiccare sinatur, sed propter tenuitatē admodū fragile, salsa aqua plenū. Nulla radix in hac planta conspicitur, sed sola ruptura vestigia apparent, atque in profundo arenosoq; maris alveo nasci, tenueq; radices obtinere credibile est, tametsi nōnulli opinentur rapido aquarū quæ ex multis insulis in Oceanū influunt cursu, istā herbā euelli & simul trahi. Cū eam opinionē pertinaciter tueretur Naclerus illius navis quæ vehebar, subortaq; esset inter nauigandū hoc mare malacia, quantū acies oculorū extendi potuit, id vndique ista planta contactum vidimus, demissisq; nōnullis iunioribus nautis quæ eam herbā à navi propellerēt, aquamq; repurgarēt, apertē cōspeximus eius herbæ glomos simul implexos ex alto mari emergentes, vbi demissa bolide nullus fundus tentari potuit.

Eius plantæ
præstantia

HÆC planta aceto & sale condita eiusdem saporis est cum Crithmo, siue fœniculo marino, & in eius penuria sumi posset; tum etiam Capparū loco à nauigantibus edi. Iussi illam recenter è mari sumptam capris quas in navi vehebamus obici, & auidē sanē vescebantur.

Facultates

NULLAS eius facultates comperi, sed quidam è nostris nautis vrinæ difficultate laborans, & arenulas crassosque humores eiiciens, crudam eam & coctam fortē edit, quoniam illi bene saperet; paucos post dies affirmavit mihi magnum ex illius esu se sentire commodum, secumq; detulit, vt peracta nauigatione, in continenti vteretur.

Lenticula Marina.

* Considerandum an non sit Lenticula marina serratis foliis nostri Lobelij cuius iconem inter marinas stirpes ad Observationum calcem exhibet.

FINIS.